

四庫全書

史部

欽定四庫全書

資治通鑑考異卷二十二

宋 司馬光 撰

唐紀十四

會昌三年正月劉沔遣麟州刺史石雄襲可汗

舊回鶻傳云豐

州刺史石雄後唐獻祖紀年錄云石州刺史石雄按是時田牟為豐州刺史今從實錄

石雄大破回鶻迎太和公主以歸

舊石雄傳曰三年回鶻大略雲朔劉沔以

太原之師屯於雲州沔謂雄曰國家以公主之故不欲急功我輩捍邊但能除患專之可也雄受教自遂勁騎

得沙陀部落兼契苾拓拔雜虜夜發馬邑徑趨烏介之
牙時虜帳逼振武雄既入城登堞視其衆寡見羶車數
十云云遂迎公主還太原回鶻傳烏介去幽州八十里
下營是夜河東劉沔帥兵奄至烏介驚走東北依和解
室韋下營不及將太和公主同走石碯兵遇公主帳因
迎歸國後唐獻祖紀年錄曰沔表帝為前鋒回鶻可汗
樹牙於殺胡山帝與石碯衛枚夜進圍其牙帳烏介可
汗輕騎而遁帝於牙帳謁見太和公主奉而歸國按一
品集會昌二年十月十七日狀訪聞劉沔頗練邊事唯
臨機決策不免遲疑深恐過為慎重漸失事機望賜劉
沔詔比緣回鶻未為侵擾且務綏懷今既殺戮邊人驅
劫牛馬頻已有詔速令驅除自度便宜臨機應變不得
過懷疑慮皆待朝廷指揮既假以使名令為諸軍節制
邊境之事皆以責成向後或要移營進軍一切自取機
便不必皆候進止實錄戊寅詔劉沔云云如前據德裕
此狀則沔豈敢不俟詔旨擅遣石碯襲擊可汗牙帳況

已有不須聞奏之詔也舊德裕傳德裕曰杞頭烽北便是砂磧彼中野戰須用騎兵若以步兵敵之理難必勝今烏介所恃者公主如今勇將出騎奪得公主虜自敗矣上然之即令德裕草制處分伐叛記曰上問討襲之計德裕奏若以步兵與回鶻野戰必無勝理回鶻常質公主同行臣思得一計料回鶻必未知有所營石雄驍勇無敵若令揀蕃渾及漢兵銳卒銜枚夜進必取得公主亦可汗可擒上從之遂令石雄領蕃渾及漢兵夜進回鶻果無遊奕伏道直至帳幕方覺遂取得公主唯可汗輕騎而遁按德裕尋自請註斫營事而石雄於城上見公主牙帳迎得之非因德裕之策今不取

烏介可汗走保黑車子族

舊回鶻傳云烏介驚走梁北約四百里外依和解室韋下

營嫁妹與室韋依附之今從伐叛記實錄新傳舊張仲武傳又云烏介既敗乃依康居求活盡徙餘種寄託黑

車子蓋以李德裕紀聖功碑云烏介并丁令以圖安依康居而求活盡徙餘種屈意黑車彼所謂康居用郅支故事耳致此誤也

二月李德裕等言求安西北庭非計

德裕傳曰三年二月趙蕃奏點憂斯

政安西北庭都護府宜出師影援德裕奏辭與此同獻替記曰三年二月十一日延英德裕奏九日奉宣令臣等向趙蕃說於點憂斯處邀求安西北庭深恐不可其下辭亦與此同按實錄辛未注吾合索始至命趙蕃飲勞之丙子中書門下奏九日奉宣其辭亦與獻替記同不知宋據何書得此辛未及丙子日也今且沒其日繫於注吾合索入對之下以傳疑

四月劉從諫從子匡周

實錄作莊周今從一品集

李德裕請討澤潞

按舊紀傳及實錄所載德裕之語皆出於伐叛記伐叛記繫於四月劉從

諫始亡之時至此君相誅討之意已決百官集議及宰臣再議皆備禮耳德裕之言當在事初實錄置此誤也

解朝政至上黨

實錄云時從諫死二十日矣按姜奎等云自四月六日後不見本使而辛巳為

從諫輟朝自六日至辛巳纔十八日耳實錄自相違今不取

五月以李宗閔為湖州刺史

獻皆記曰四月十九日上言東都李宗閔我聞比與

從諫交通今澤潞事如何可別與一官不要令在東都

德裕曰臣等續商量上又云不可與方鎮只與一遠郡

德裕又奏云須與一郡此蓋德裕自以宿憾因劉稹事害宗閔畏人譏議故於獻替記載此語以隱其跡耳今

從實錄

宰相欲且遣使諭劉稹上即命討之

獻替記曰五月十一日德裕疾病先

請假在宅李相紳其日亦請假李相讓夷獨對之便決攻討之意李相歸中書後錄聖意四紙令德裕草制至

薄晚封進明日遂降麻處分舊

本紀九月下制討稹今從實錄

崔鉉同平章事

實錄李讓夷引鉉為相今從補國史

九月以石雄代李彥佐

實錄召彥佐入奉朝請俟罷兵日赴鎮按彥佐前已罷武寧今

又罷晉絳復赴何鎮實錄誤也

十月庚申上稱石雄良將

獻替伐叛記皆云十月五日

奏到庚午對宰臣言乃是十五日恐誤

十二月壬宰進攻澤州

一品集十月二十三日狀緣王宰兵已深入須取澤州按此月

三日宰始得天井關於十月之末豈能深入取澤州蓋十二月十三日狀二字誤在月下耳

劉稹請降於李石李德裕上言

一品集正月四日狀曰臣等得李石狀報劉稹

潛有款誠云云又曰今饋運之費計至春末並足如二月已來尚未殄滅然議納降亦未為晚又草詔賜石曰必不得因此遷延令其得計仍不得先受章表便與奏聞實錄上貶崔碣仍詔敢言罷兵者送賊境戮之德裕狀正月四日上然石發奏必在楊弁未亂前故置於此

四年正月德裕上言劉稹與諸將舉族面縛方可受納

一品集奏狀云如劉稹自來却令送入輒不得受按稹若自來豈有却送入之理恐是稹下脫不字

詔王元逵以步騎自土門入應接王逢軍

實錄詔側近行營量抽兵

翦撲又詔王元逵以兵五千扼土門張仲武把雁門以為聲援今從伐叛記

三月王逢敗康良佺

實錄王宰奏賊將康良佺敗棄石會關移軍入三十里守鼓腰嶺按

石會關在潞州北與河東接宰時在澤州南何以得敗良佺蓋逢字誤為宰耳

劉濛為巡邊使

實錄以濛為巡邊使在明年二月壬寅壬寅二十五日也按一品集會昌四年

二月二十二日奏狀曰緣李回等稱點戛斯使云今冬必欲就黑車子收回鶻可汗餘燼切望國家兵馬應接點戛斯使四日已賜敕書許令幽州太原振武天德各於要路出兵邀截又曰仍令伐北諸軍擬擬排比又曰其幽州兵馬至多不必先令排比待至冬初續降中使賜詔點戛斯使來在四年二月德裕奏狀所謂今冬防

秋冬初者皆四年事也不容至五年二月始以濛巡邊使濛之奉使要在今年春夏不知的何月日且附此

六月減州縣佐官一千二百一十四員

獻替記曰減得二十二員新傳

曰罷二千餘員舊柳仲郢傳曰減一千二百員今從之

七月甲辰杜悰同平章事

新表悰入相在閏月壬戌今從實錄

八月德裕請以盧弘止為三州留後

舊紀傳皆作弘正實錄新紀傳皆作

弘止今從之

十二月石雄為河陽節度使

實錄九月盧鈞奏十七日石雄回軍赴孟州按雄於

時未為河陽節度使實錄誤也

五年七月上都東都兩街各留二寺每寺留僧三十人

節度等州各一寺三等留僧

實錄中書門下奏請上都東都兩街各留寺十所每

寺留僧十人大藩鎮各一所僧亦依前詔敕上都東都每街各留寺兩所每寺僧各留三十人中書門下奏奉敕諸道所留僧尼數宜令更商量分為三等上至二十人中至十人下至五人今據天下諸道共五十處四十六道合配三等鎮州魏博淮南西川山南東道荆南嶺南汴宋幽州東州鄂岳浙西浙東宣歙湖南江西河南府望每道許留僧二十人山南西道河東鄭滑陳許潞磁鄆曹徐泗鳳翔兗海淄青滄齊易定福建同華州望令每道許留十人夏桂邕管黔中安南汝金商州容管望每道許留五人一道河中已救下留十三人按鎮州等凡五十六州四十一道今云五十處四十六道誤也杜牧杭州南亭記曰武宗即位始去其山臺野邑四萬

所冠其徒幾至十萬人後至會昌五年始命西京留佛
寺四僧惟十人東京一寺天下所謂節度觀察同華汝
三十四治所得留一寺僧準西京數其他刺史州不得
有寺凡除寺四千六百僧尼并冠二十六萬五百實錄
注又云按唐時石刻云兩都留寺四僧各十人郡
國留寺二僧各三人數皆不同今從實錄前文

八月毀招提蘭若四萬餘區

會要元和二年薛平奏請賜中條山蘭若額為太和

寺蓋官賜額者為寺私造者為招提蘭若杜牧所謂山臺野邑是也

盧鈞還入上黨盡殺亂兵

獻替記上信任宰臣無不先訪問無獨斷之事唯誅討澤

潞不肯捨赴振武官健及誅翦黨項此二事並禁中發詔處分更不顧問振武官健回旗不肯進發先害監軍僕一人監軍王惟直自出曉諭又被傷痕旬日而卒禁中兩軍樞密已下恨其不殺節將唯害中人所以激上

之怒盡須勦戮上問宰臣曰我遣石雄領兵至澤潞今
盧鈞不誅討罪人如何德裕奏曰盧鈞已失律性又寬
懷必恐自誅不得若便替却盧鈞亂卒罪惡轉大須興
兵討伐恐不如先除替令新帥誅翦上謂德裕曰勿惜
盧鈞本非材將救澤潞叛兵疑李丕報嫌注劉稹平後
處置澤潞與劉稹同惡僅五千餘人皆是取得高文端
王釗狀通姓名勘李丕狀同然後處分其間有三兩人
或王釗狀無名並不更問足明是李丕不能逞其憾又
云惟務苟安因循為政凡方鎮發兵只合不出軍城嚴
兵自衛於城門閱過部伍更令軍將慰安豈有自出送
兵馬又今家口縱觀事同兒戲實不足惜緣大兵之後
須有防虞臣不敢隱默由是中詔處分不復顧問按盧
鈞還入潞州諭戍諭兵使赴振武尋遣兵追擊盡殺之
非上不肯捨也既云不可便替又云不如先除替語自
相違上云勿惜盧鈞是上語下云臣不敢隱默乃是德
裕語獻替記至此差外尤甚不可復據又處置澤潞五

千餘人太多必
是五十字誤耳

六年上自正月乙卯不視朝

實錄作十五日按獻替記自正月十三日後至三月

二十日更不開延英時見中詔處分莫得預焉今從之

上不禮光王怡

韋昭度續皇王寶運錄曰宣宗即憲皇第四子自憲皇崩便合紹位乃與姪文

宗文宗崩武皇慮有他謀乃密令中常侍四人擒宣宗於永巷幽之數日沉於宮廁宦者仇公武慙之乃奏武宗曰前者王子不宜久於宮廁誅之武宗曰唯唯仇公武取出於車中以糞土雜物覆之將別路歸家密養之三年後武皇宮車晏駕百官奉迎於玉宸殿立之尋擢仇公武為軍容使尉遲偓中朝故事曰敬宗文宗武宗相次即位宣皇皆叔父也武宗初登極深忌馬一日會鞠於禁苑間武皇召上遙覩瞬目於中宮仇士良士良

躍馬向前曰適有旨王可下馬士良命中官與出軍中
奏云落馬已不救矣尋請為僧游行江表間會昌末中
人請還京遂即位令狐澄貞陵遺事曰上在藩時嘗從
駕迴而上誤墮馬人不之覺比二更方能興時天大雪
四顧悄無人聲上寒甚會巡警者至大驚上曰我光王
也不悟至此方困且渴若為我求水警者即於旁近得
水以進遂委而去上良久起舉甌將飲顧甌中水盡為
芳醪矣上獨喜自負一舉盡甌已而體微暖有力遂步
歸藩邸此三事皆
鄙妄無稽今不取

三月辛酉立怡為皇太叔

舊紀三月一日立為皇太叔
武宗實錄云壬戌宣宗實錄

云辛酉按獻替記云自正月十三日後至三月二十日
更不開延英蓋二十一日則宣宗見百寮也今從宣宗

實錄

四月李德裕同平章事荆南節度使

實錄新表傳皆云德裕自守太尉檢

校司徒為荆南節度使按制辭皆無責降之語豈可遽自守太尉檢校司徒今從舊紀又貞陵遺事曰上初即位於太極殿時宰相李德裕與行冊禮及退上謂宦侍云云聽政之二日遂出為荆門舊德裕傳曰五年武宗上徽號累表乞骸不許德裕病月餘堅請解機務乃以本官平章事兼江陵尹荆南節度使數月追復知政事宣宗即位罷相出為東都留守按舊紀新表及諸書武宗朝德裕未嘗罷免此年九月方自江陵除東都留守舊傳謬誤今從實錄

五月上京兩街留兩寺外各增置八寺

杭州南亭記曰今天子即位天

下州率與二寺用齒衰男女為其徒各止三十人兩京數倍其四五馬實錄準五日敕兩京先留寺兩所外更

漆置八所注唐刻石云京都兩街各置十寺
寺僧五十人蓋謂二年正月敕後非今敕也

八月贈王才人貴妃隨葬端陵

蔡京王貴妃傳曰帝疾

息處濃粧潔服如常日乃取所翫用物散與內家靜盡
持帝所授巾至帝前已見升遐容易自縊而仆於御座
下以縊為名而得卒舊紀武宗葬端陵德妃王氏祔焉
李德裕獻替記曰自上臨御王妃有專房之寵至是以
驕妬忤旨一夕而殞羣情無不驚懼以謂上功成之後
喜怒不測德裕因以進諫在五年十月與王貴妃傳不
同恐獻替記誤康駢劇談錄曰孟才人善歌有寵於武
宗屬一旦聖體不豫召而問之曰我或不諱汝將何之
對曰若陛下萬歲之後無復生為是日令於御前歌何
滿子一曲聲調悽咽聞者涕零及宮車晏駕哀慟數日
而殞寔於端陵之側此事
恐止是王才人傳聞不同

宣宗大中元年二月白敏中排李德裕

實錄白敏中令孤絢在會昌中

德裕不以朋黨疑之置之臺閣及德裕失勢抵掌戰手同謀斥逐而崔鉉亦以會昌末罷相怨德裕大中初敏中復薦鉉在中書乃令其黨人李咸者訟德裕輔政時陰事罷德裕留守以太子少保分司東都按舊傳絢以大中二年自湖州刺史入知制誥鉉以三年自河中節度使入為相此時未也實錄誤

八月史憲忠破突厥

按突厥亡已久蓋猶有餘種在振武之北者

二年五月太皇太后郭氏崩

實錄五月戊寅以太皇太后寢疾權不聽政宰臣帥

百僚問太后起居已卯復問起居下遺令是日太后崩初上纂位以憲宗遇弒頗疑后在黨中至是暴得疾崩帝之志也甲申白敏中帥百僚上表請聽政不許乙酉又上表不許丙戌三上表乃依六月貶禮院檢討官王

暉為潤州句容令舊傳曰宣宗繼統即后之諸子也恩禮愈異於前朝大中年崩祔景陵后歷位七朝五居太母之尊人君行子孫之禮福壽隆貴四十餘年雖漢之馬鄧無以加焉識者以為汾陽社稷之功未泯復鍾慶於懿安焉裴延裕東觀奏記曰憲宗皇帝晏駕之夕上雖幼頗記其事追恨光陵商臣之酷即位後誅除惡黨無漏網者郭太后以上英察孝果且懷慙懼時居興慶宮一日與二三侍兒同升勤政樓倚衡而望便欲殞於樓下欲成上過左右急持之即聞于上上大怒其夕太后暴崩上志也又曰懿安郭太后既崩喪服許如故事禮院檢討官王暉抗疏請后合葬景陵配饗憲宗廟室既入上大怒宰臣白敏中召暉詰其事暉對云云翌日暉貶潤州句容縣令周墀亦免相按實錄所言暴崩事皆出於東觀奏記若實有此事則既云是夕暴崩何得前一日先下詔云以太后寢疾權不聽政若無此事則廷裕豈敢輒誣宣宗或者郭后實以病終而宣宗以平

日疑恣之心欲黜其禮故睥爭之疑以傳疑今參取之
東觀奏記又曰杜悰通貴日久門下有術士姓李悰任
西川節度使馬植罷黔中赴闕至西川李術士一見植
謂悰曰馬中丞非常人也相公厚遇之悰未之信術士
一日密言於悰曰相公將有甚禍非馬中丞不能救乞
厚結之悰始驚信發日厚幣贈之仍令邸吏為植於闕
下賣宅生生之費無闕馬植至門方知感悰不知其旨
尋除光祿卿報狀至蜀悰謂術士曰貴人到闕作光祿
勲矣術士曰姑待之稍進大理卿又遷刑部侍郎充諸
道鹽鐵使悰始驚憂俄而作相懿安皇太后崩後悰懿
安子壻也忽一日內膳子索檢責宰相元載故事植諭
旨翌日延英上前萬端營救植素辯能回上旨事遂中
寢按植會昌中已自黔中入為大理卿
悰今年二月始為西川節度使今不取

七月石雄自陳黑山烏嶺之功

此出范攄雲谿友議彼
以烏嶺為天井誤也

三年二月吐蕃三州七關降

實錄涇原節度使康季榮奏吐蕃宰相論恐熱殺東

道節度使奉表以三州七關來降獻祖紀年錄亦云殺東道節度使按補國史敘論恐熱事甚詳至五年五月始來降此際未降也又不云殺東道節度使且恐熱若以三州七關來降朝廷必官賞之何故但賞邊將而不及恐熱蓋三州七關以吐蕃國亂自來降唐朝廷遣諸道應接撫納之非恐熱帥以來實錄誤耳

八月河隴老幼千餘人

實錄云數千人今從舊傳

十一月幽州逐張直方推周緄為留後

舊紀十一月幽州軍亂逐張直

方軍人推周緄為留後四年九月周緄卒軍人立張允仲為留後直方傳曰直方多不法慮為將卒所圖三年冬託以遊獵奔赴闕廷張允仲傳曰四年戌帥周緄寢疾表允仲為留後新紀四年八月幽州軍亂逐張直方

張允仲自稱留後傳亦言直方出奔即以允仲為留後
實錄直方赴闕亦在去年八月至九月又云張允仲知
留後皆無周緄
姓名今從舊書

四年八月周緄薨張允仲為留後

舊紀亦無朝廷命琳為節度使年月至此

但云幽州節度使周緄卒軍人立張允仲為留後實錄九月幽州大將表請押衙張允仲知留後事舊允仲傳曰大中四年戎帥周緄寢疾表允仲為留後朝廷可其奏今參取之

十月令狐綯同平章事

舊紀在十一月今從實錄新紀

五年二月張義潮降

補國史作議潮今從實錄新舊紀傳

上以南山平夏党項久未平

唐年補錄曰松州南有雪山故曰南山平夏州名也

十一月以張義潮為歸義節度使

唐年補錄舊紀義潮降在五年八月獻祖

紀年錄及新紀在十月按實錄五年二月壬戌天德軍
奏沙州刺史張義潮安景旻及部落使閻英達等差使
上表請以沙州降十月義潮遣兄義澤以本道瓜沙伊
肅等十一州地圖戶籍來獻河隴陷沒百餘年至是悲
復故地十一月建沙州為歸義軍以張義潮為節度使
河沙等十一州觀察營田處置等使新紀五年十月沙
州人張義潮以瓜沙伊肅鄯甘河西蘭岷廓十一州歸
于有司新傳三州七關降之明年沙州首領張義潮奉
十一州地圖以獻擢義潮沙州防禦使俄號歸義軍遂
為節度使參考諸書蓋二月義潮使者始以得沙州來
告除防禦使十月又遣義澤以十一州圖籍來上除
節度使也今從實錄新傳云三州降之明年誤也

六年六月畢誠除邠寧節度使

舊傳懿宗召問邊事今從實錄

七年十二月度支奏天下所納錢數

續皇王寶運錄具載是歲度支支收

之數舛錯不可曉
今特存其可曉者

八年九月立皇子洽汭汶為王

唐年補錄五年正月甲戌朔封三王今從寶錄

新紀

十年五月韋澳為京兆尹

貞陵遺事東觀奏記皆曰帝以崔罕崔郢併敗官面除澳

京兆尹按大中制集澳代罕郢代澳云罕郢併敗官誤也今從實錄新紀舊紀新傳耳

澳杖鄭光莊吏

東觀奏記曰太后為上言之上於延英問澳澳具奏本末上曰今日納租足放

否澳曰尚在限內明日則不得矣上入奏太后曰韋澳不可犯且與送錢納却頃刻而租入今從柳毗續貞陵

遺事

九月韋厘貶永州司馬

東觀奏記實錄貶司農卿韋厘為永州司馬厘夜令術士為厭

勝之術御史臺劾奏故也范攄雲谿友議曰太僕卿韋觀欲求夏州節度使云云貶潘州司馬今官名從東觀

奏記及實錄事

采雲谿友議

鄭顥求作相父祇德與書

劉崇遠金華子雜編顥既判戶部馳逐台司甚切時家君

猶鎮山東聞之遣書謂顥云云按實錄九年十二月顥父祇德以賓客分司金華子云鎮山東誤也

十一年正月韋澳為河陽節度使

舊傳云十二年誤也今從實錄

七月流祝漢貞

實錄大中十一年七月貶嗣韓王乾裕於嶺外初伶人祝漢貞寵冠諸優復出

入宮邸乾裕以金帛結之求刺史雖已納賂而不敢言至是為御史臺劾奏故貶杖漢貞流天德軍今從貞陵遺事

十月李承勛奏尚延心為河漕都遊奕使

此事出補國史按張義潮以十

一州降河渭已在其間今延心復以河渭降者義潮所帥者漢民延心所帥者蕃族也又補國史不云延心以何年月降新傳但云張義潮降其後河渭所虜將尚延心以國破亡亦獻款秦州刺史高駢誘降延心及渾末部萬帳遂收二州拜延心武衛將軍駢收鳳林關以延心為河渭等州都遊奕使按舊傳高駢懿宗時始為秦州刺史新傳誤也今從補國史因承勛移鎮涇原并延心事置於此

十二年正月王式為安南都護

舊紀式為安南在二月今從實錄

戊午劉瑒同平章事

東觀奏記曰十一年上手詔追之既至拜戶部侍郎判度支十二月

十七日次對上以御按歷日付瑒令於下旬擇一吉日瑒不諭上旨上曰但擇一拜官日即得瑒跪奏二十五日甚佳上笑曰此日命卿為相祕世無知者高湜為鳳翔從事湜即瑒舊寮也二十四日辭瑒於宣平里私第湜曰竊度旬時必副具瞻之望瑒笑曰來日具瞻何旬時也湜不敢發詰旦果爰立矣始以此事洩於湜實錄瑒傳曰明年正月十七日次對帝以歷日付瑒令擇吉日瑒跪奏二十五日今從之

二月崔慎由罷相

唐闕史曰丞相太保崔公一日備顧問

云後旬日罷知政事舊傳初慎由與蕭鄴同在翰林情不相洽及慎由作相罷鄴學士俄而鄴自度支平章事恩顧甚隆鄴引瑒同知政事遂出慎由東川東觀奏記劉瑒既入相與慎由議政於上前慎由曰唯當甄別品

流瑒云云慎由不能對因此恩澤浸衰尋罷
相為東川節度使削平章事今從唐闕史

五月使優人追李璣節

此出東觀奏記而璣不知以何時除嶺南按實錄大中九年韋

曙除嶺南節度使今年正月薨楊發代之三月蕭傲言柳珪四月璣自司農卿為右金吾大將軍五月聞嶺南亂蓋於此除璣嶺南而做封還以璣為非定亂之才故也今置於此

六月安南都護李涿

實錄或作琢或作涿樊綽蠻書亦作涿實錄及新書皆有李琢傳聽

之子也大中三年自洛州刺史除義昌節度使九年九月自金吾將軍除平盧節度使不云曾為安南都護按都護位卑琢既為義昌節度使不應為都護疑作都護者別一李涿非聽子也

羣蠻導南詔侵邊

舊紀琢侵刻獠民羣獠引林邑蠻攻安南府按蠻書寇安南者南詔非林

也邑

蠻寇安南

實錄無涿除安南年月蠻書云大中八年安南都護擅罷林西原防冬戌卒洞主李由獨

等七綰首領被蠻誘引復為親情日往月來漸遭侵軼又云桃花蠻本屬由獨管轄亦為界上戌卒自大中八年被峯州知州官中文狀與李涿請罷防冬將健六千人不要味真登等州界上防遏其由獨兄弟力不禁被蠻拓東節度使與書信將外甥嫁與由獨小男補拓東押衙自此後七綰洞悉為蠻收管舊紀咸通四年十一月劉蛻等言令狐綯受李琢賄除安南生蠻寇實錄咸通二年六月詔如聞李琢在安南日殺害杜存誠貪殘頗甚致令溪洞懷怨據此則本因李涿貪暴無謀以致蠻寇明矣然則大中八年至十一年舊紀實錄不言蠻為邊患蓋但時於邊境小有鈔盜未敢犯州縣至此冠安南而舊紀實錄始載之又不知此冠安南即鄭言平

刻錄所謂至錦
田步時非也

十三年八月左軍副使元元實

或作邢元實今從東
觀奏記懿宗實錄

宣宗明察沈斷

續真陵遺事曰越守嘗進女樂有絕色
者上初悅之數月錫賚盈積一旦晨興

忽不樂曰玄宗只一楊妃天下至今未平我豈敢忘乃
召美人曰應留汝不得左右或奏可以放還上曰放還
我必思之可命賜酒一杯此太
不近人情恐譽之太過今不取

李玄伯等伏誅

東觀奏記畢誠在翰林上恩顧特異許
用為相深為丞相令狐絢緩其入相之

謀誠思有以結絢在北門求得絕色非人世所有盛飾
珠翠專使獻絢絢一見之心動謂其子曰畢太原於吾
無分今以是餌吾將傾吾家族也一見立返之誠又瀝
血輸啓事于絢絢終不內乃命邸貨之東頭醫官李玄

伯上所狎昵者以錢七十萬致於家為舍正堂坐之玄伯夫妻執賤役以事焉踰月盡得其歡心矣乃進于上一見惑之寵冠六宮玄伯燒伏火丹砂連進以市恩澤致上瘡疾皆玄伯之罪也懿宗即位玄伯與山人王岳道士虞紫芝俱棄市今從實錄

九月何弘敬兼中書令

東觀奏記大中十三年三月魏博何弘敬就加中書令據實錄

二月弘敬加太傅此月乃加中書令在懿宗即位後東觀奏記誤也

十二月裴甫攻陷象山

實錄作仇甫按平剡錄作裴甫今從之

南詔陷播州

舊紀實錄今年皆無陷播州事惟新紀有之實錄咸通六年三月盧潘奏云大中十

三年南蠻陷播州補國史曰雲南自大初中朝貢使及西川貢子人數漸多節度使奏請釐革減省有詔許之

錄詔報雲南雲南回牒不遜新南詔傳曰朝貢歲至從
者多杜悰自西川入朝表無多內蠻僚豐祐怒即慢言
索質子蓋謂蠻子弟學成都者也按杜悰以咸通二年
十月入朝而豐祐大中十三年已死則建議減蠻僚者
必非悰入朝後
事新傳誤也

資治通鑑考異卷二十二

欽定四庫全書

資治通鑑考異卷二十三

宋 司馬光 撰

唐紀十五

懿宗咸通元年六月王式榘裴甫送京師

平剌錄曰諸軍圍賊於剌

賊悍甚其所謂女軍者亦垂城摘礮以中人三日凡八十三戰賊雖斃官軍亦疲裴甫佯言乞降諸將使騎來白公曰賊憊整休耳謹備之仍遣押牙薛敬義謂諸將曰功成矣勉之勿怠也果復三戰二十一日夜甫與劉睢劉慶十餘輩又從百餘人出遙與諸將語伺我軍之懈將使勇者潰圍焉諸將得公誠夜皆設伏於營前甫

輩離城數十步伏兵疾走以間之銳師數百復繼之城
中賊不出甫遽甚不知所為遂成擒焉至是用兵六十
六日矣二十三日縛置府城公於衙門陳兵以見執其
徒劉睢劉慶二十餘輩立斬之城裴甫獻闕下玉泉子
見聞錄曰王式討裴甫甫始起於剡既為官軍所敗復
入於剡城堅卒銳不可遽拔式乃約降許奏以金吾將
軍甫許焉其將劉睢獨以為不可比及越城左右則械
手以木曳頸以組甫曰吾既已降何用是為左右曰法
也到越則釋去公且行有命矣既至式登南樓俟之曰
裴甫何罪罪皆劉睢輩命立斬之睢顧謂甫曰君竟拜
金吾乎斬甫于長安東市初甫之入剡也雖已累敗向
使城守期歲未可平也玉泉子曰古人有言殺將不祥
李廣所以不侯良有以也王公亦不聞大貴鄭公述平
剡錄一何曲筆哉雖驟歷清顯而卒以喪明不復起焉
可不慎哉按二書所言莫知孰是然裴甫在剡城窮困
已極勢不能久式不必更以詐誘之或者諸將為之不

可知也甫之出降也或欲突走或被誘而來皆不可知要之為出城乞降官軍因邀斷其後擒之耳

九月劉鄩請贈李德裕官

裴旦李太尉南行錄載咸通二年九月二十六日右拾遺

內供奉劉鄩表略云子曄貶立山尉去年獲遇陛下惟新之命覃作解之恩移授郴縣尉今已沒於貶所又曰血屬已盡生涯悲空又曰孤骨未歸於塋域一男又殞於江湘又曰其李德裕請特賜贈官敕依奏實錄注引東觀奏記云令狐相絢夢德裕曰某已謝明時宰相公哀之許歸葬故里絢具為其子瀉言之瀉曰李衛公犯衆怒又崔相鉉魏相謩皆敵人也見持政必將上前異同未可言之也後數日上將坐延英絢又夢德裕曰某委骨海上思還故里與相公有舊幸憫而許之既寤復謂瀉曰向見衛公精爽尚可畏吾不言必掇禍明日入中書且為同列言之既而於帝前論奏許具子蒙州立山尉曄護喪歸葬又是時柳仲郢鎮東蜀設奠於荆南

命從事李商隱為文曰恭承新渥言還舊止又曰身留蜀郡路隔伊川鄴奏乃云孤骨未歸瑩域曄懿宗初纔徙郴縣尉未詳或者後人偽作之非鄴本奏也實錄注又云白敏中為中書令時與右庶子段全緝書云故衛公太尉災興鵠鳥悲結江魚親交雨散於西園子弟蓬飄於南土嘗蒙一顧繼履三台保持獲盡於天年論請爰加於寵贈全緝嘗為德裕西川從事故敏中語及云按此似緝敏中開發而數本追復贈官多連鄴奏德裕素有恩於敏中敏中前作相既遠貶之至此又掠其美鄙哉按劉鄴表云去年獲遇陛下惟新之命覃作解之恩則上此表在咸通元年非二年也舊傳鄴為翰林學士承旨以李德裕貶死珠崖大中朝令孤絢當權累有赦宥不蒙恩例懿宗即位絢在方鎮屬郊天大赦鄴奏論之李太尉南行錄鄴此時未為翰林學士因上此表敕批便令內養宣喚入翰林充學士餘依奏金華子雜編曰宣宗嘗私行經筵資庫見廣廈連綿錢帛山積問

左右曰誰為此庫侍臣對曰宰相李德裕執政日以天下每歲備用之餘盡實於此自是以來邊庭有急支備無乏者茲實有賴上曰今何在曰頃以坐吳湘獄貶于崖州上曰如有此功於國微罪豈合深譴由是劉公鄭得以進表乞追雪之上覽表遂許其加贈歸葬焉按宣宗素惡德裕故始即位即逐之豈有不知其在崖州而云豈合深譴又劉鄩追雪在懿宗時此說殊為淺陋今不取

十二月南詔陷交趾

新南詔傳大中時李琢為安南經畧使苛墨自私以斗鹽易一牛夷

人不堪結南詔將段酋遷陷安南都護府號白衣沒命軍懿宗絕其朝貢乃陷播州安南都護李鄴屯武州咸通元年為蠻所攻棄州走天子斥鄴以王寬代之按宣宗時南詔未嘗陷安南据新傳則似大中時已陷安南咸通元年又陷武州也且李鄴安南失守然後奔武州非在武州而棄之新傳誤也今從實錄

二年二月杜悰請不罪宰相

新傳云宣宗大漸樞密使王歸長等矯詔迎鄆王立

之懿宗即位欲罪大臣悰解之按立鄆王者王宗實新傳云歸長誤也今從補國史

六月王寬為安南經略使李鄴貶儋州司戶

實錄又賜寬手詔云

云如聞李琢在安南日殺害杜存誠李鄴又處置其子守澄使誘導羣蠻陷沒城邑卿到鎮日於李鄴處索取前後敕詔一一參詳初李琢在鎮蠻首領愛州刺史兼土軍兵馬使杜存誠密誘溪洞夷獠為之鄉導琢察其不忠戮死焉及李鄴至鎮蠻陷安南鄴走武州召土軍收復城邑而存誠家兵甚衆朝廷務姑息乃贈存誠金吾將軍鄴以失備貶儋州補國史蠻陷安南李鄴投武州召土軍收復頗有功績殺首領杜存誠以捍禦盤桓不戮力盡敵兼洞夷獠為鄉導之罪也鄴貶儋州後以存誠溪洞彊獠家兵數多子弟繼總軍旅皆輸忠勇軍

府倚賴方甚朝廷亦加姑息乃再舉憲章長流鄆崖州
贈存誠金吾將軍以誘其竭力命前鹽州刺史王宙為
都護按鄆所殺存誠之子守澄已為王式所逐鄆至旬
日殺之非因捍禦不戮力也代鄆者乃王寬非王宙補
國史誤也今獨取鄆克復安南一事餘皆從平刻錄實錄

七月孟穆為南詔弔祭使會南詔入寇不行

實錄在此年十二月

按補國史杜邠公再入輔建議遣使弔祭令其改名纔
命使臣已破越雋城池攻邛崃關鎮使臣逗留數月不
發然則命穆充使當在寇雋州前實錄書於十二月誤
也按南詔已稱帝陷安南豈可彌縫悰但欲姑息故陽
不知其僭號反以陷安南者為土蠻耳

三年二月以蔡襲代王寬

補國史王宙有緝理撫衆才
遠人懷惠纔未周歲南蠻復

侵封部請兵設備累以危急上聞乃命桂管都防禦使蔡襲代之實錄以前湖南觀察使蔡襲為安南經略等使王寬亦制置失宜諸部蠻相帥內寇故命襲往代焉今從之

發諸道兵授襲蠻引去

實錄咸通三年二月以蔡襲為安南經略招討處置等使三月

以蔡京充荆襄以南宣慰安撫使五月以京為嶺南西道節度使舊紀三年十一月遣蔡襲率禁軍三千赴援安南按補國史云咸通三年使左庶子蔡京制置嶺南事又云命桂管都防禦使蔡襲代王寬其明年使蔡京制置嶺南事然則襲除安南似在咸通二年也又按樊綽蠻書云臣咸通三年三月四日奉本使尚書蔡襲手示密委臣深入賊帥朱道古營寨三月八日入賊重圍之中臣却回一一白於都護王寬領得臣書牒全無指揮擅放軍回苟求朝獎致襲枉傷矢石陷失城池徵之其由莫非蔡京王寬之過綽既謂襲為本使為之入蠻

則是襲已到官又云回白都護王寬則是寬猶未去任也不知緋不白襲而白寬何故也又襲將兵代寬寬為已替之人安能擅放軍回令襲陷沒疑蠻書擅放軍回字上少蔡京二字襲除安南不知的在何年月今從實錄

段文楚坐變更舊制左遷

補國史文楚到後城邑半落人戶彫殘纔得數月朝廷責

其更改舊制降受威衛分司蓋文楚既之官而朝廷責邕州陷沒由文楚請罷三道戍兵自募土軍故云更改舊制而實錄云及文楚再至城池北廢人戶殘耗由是頗更舊制未數月朝廷慮致煩擾復改命懷玉馬新傳文楚數改條約衆不悅以胡懷玉代之蓋由補國史改更舊制之語相承致誤也

七月徐州軍逐溫璋

舊傳曰璋咸通末為徐泗節度使徐州牙卒曰銀刀軍頗驕橫璋至

誅其凶惡者五百餘人自是軍中畏法按誅銀刀軍者王式也舊傳誤

八月王式誅銀刀軍

舊傳曰式至鎮盡誅銀刀等七軍徐方平定金華子雜編曰溫璋失

律於徐州自河陽移式往鎮之式領河陽全軍赴任徐州將士聞式到近境先遣衛隊三百人遠接式衣衣坐胡床受參既畢乃問其逐師之罪命皆斬於帳前不留一人既而相次繼來莫知前死者音耗至則又斬之亦無脫者如是數日銀刀都數千人垂盡虎狼之衆居常咸謂能吞噬於人及于斯際式衣襖子半臂曳履危坐逐人皆拱手就戮無一敢旅拒者其後親戚相訝不能自會焉按若頓殺數千人豈有人不知者又式自浙東除武寧非河陽也今從實錄

十一月南詔寇安南

補國史云四年春南蠻帥衆五萬攻安南按蠻書咸通三年十二月

二十一日桃花人安南城西南角下營茫蠻於蘇歷江岸屯聚裸形蠻亦當陳面二十七日蠻賊逼交州城則是今年冬末蠻已圍交州也今從實錄

救蔡襲屯海門

實錄詔襲且住海門是令棄交趾退屯海門也按襲死時猶在交趾蓋詔書到

時襲已被圍不得通也

四年正月南詔陷交趾

實錄二月安南經略使蔡襲奏蠻賊楊思儋羅伏州扶耶縣令

麻光高部領其衆五六千人於城西角下營嶺南東道節度使韋宙奏蠻賊云十二月二十七日逼安南城池經畧使檢校工部尚書蔡襲出兵格鬪殺傷相當正月二日賊衆圍城進攻甚急襲城上以車弩射之至七日城陷襲右膊中弩箭死家口并元從七十餘人悉隕於賊從事樊綽攜印渡江具荆南江西鄂岳襄州兵突到

城東水際無船却回相率入東羅門殺蠻僅一二十人
至夜賊救兵至遂屠其城按此二奏似後人采集蠻書
為之其中又多舛舛如楊思縉蠻書中兩處有之皆作
楊思縉蓋草書誤為僭耳彼雖蠻夷豈肯名思縉也張
彭錦里者舊傳載高駢與雲南牒亦云楊思縉善蘭節
度使新書亦承此誤為僭又蠻書所云思縉光高部領
者桃花蠻五六千人耳非謂盡將羣蠻也補國史云蠻
衆五萬攻安南非止五六千人也又十二月二十一日
裸形蠻范蠻桃花人已在城下豈至二十七日始逼安
南也蠻書言二十七日逼城者但記見河蠻尋傳蠻之
日耳又言正月二日三日者但記以車弩射得苴子之
日耳非其日始圍城也且城陷奔迸之際非樊綽身在
其間豈知其詳然四道兵入城所殺人數猶因僧無早
說始知之韋宙身在廣州何得所奏一如樊綽之書其
偽明矣新傳曰是夜蠻
遂屠城亦承實錄而誤

二月甲午歷拜十六陵

拜十六陵非一日可了而舊史無還官之日唐年補錄云二月

庚子一日拜十六陵尤難信也

七月復置安南都護府於行交州

實錄以郡州為交州補國史亦同又云夏

侯貞孝公請用高駢為郡州進討使按地理志無郡州補國史又云海門今晏州地理志晏州乃屬瀘州都督府嶺南亦無之

五年七月康承訓分司

補國史嶺南東道節度使韋宙兼領供軍使將吏在邕州者潛

令申報事無巨細莫不知之復究尋克捷事多虛妄具所聞啟於丞相承訓已自懷疑懼辭疾免責授右武衛大將軍分司東都信宗實錄承訓傳曰南蠻陷交趾以承訓為嶺南西道節度使踰歲討平之加檢校右僕射

與鄰帥不叶以右武衛大將軍罷歸蓋其
家行狀云爾今從補國史懿宗實錄新傳

張茵不敢進取以高駢代之

補國史茵驍將無遠略經年不敢進軍丞相夏侯貞

孝公獨獻密疏請用驍衛將軍高駢有制以本官充郡
州進討使旋拜安南節度使其茵所領兵並付高公指
揮按今年正月詔茵進軍收復安南若經年則孜已罷
相今從實錄附於此實錄駢官為右領軍上將軍太高
今從補國史舊紀五年四月南蠻寇邕管以秦州經
略使高駢率禁軍五千會諸道之師禦之今不取

六年九月高駢大破蠻衆

舊紀實錄皆云五月駢奏於
邕管大敗林邑蠻按林邑在

海南自至德後號環王與中國久絕劉昫但見南蠻則
謂之林邑誤也新南詔傳亦云駢以選士五千度江敗
林邑兵於邕州亦承此而誤也舊紀又云是歲秋高駢
自海門進軍破蠻軍收復安南府蓋因駢今秋發海門

遂云復安南耳復安南實在明年也補國史云五年九月高公力戰破峯州蠻於南定縣按張茵以五年正月勾當交州受詔收復安南補國史云經年不進軍乃以駢代之則駢豈得以其年九月已破峯州蠻乎補國史又云駢破峯州蠻後近四月餘日表報不至朝廷以王晏權代之六月高公進軍收復安南亦不云幾年六月蓋駢以六年九月破峯州蠻七年六月破安南耳實錄又云九月駢奏破蠻龍州營塞并燒食糧等事詔駢令於當界守備緣近有赦文已許恩宥伺其悛改亦未要更深加討逐按赦在明年十一月此詔必在駢已平安南後實錄誤也新傳又云駢擊南詔龍州屯蠻酋燒貨畜走龍州即安南所管龍編縣也

十二月鄭太后崩

舊傳大中末崩誤也今從實錄

七年二月張義潮奏僕固俊克西州

實錄義潮奏俊收西河及部落胡漢

皆歸伏并表賀收西州等城事新吐蕃傳曰七年俊擊取西州收諸部按大中五年義潮以十一州圖籍來上西州已在其今始云收西州者蓋當時雖得其圖籍其地猶為吐蕃所據耳

拓跋懷光破論恐熱

實錄義潮又奏鄯州城使張季顥押領拓跋懷光下使送到尚恐熱

將并隨身器甲等並以進奉新吐蕃傳曰鄯州城使張季顥與尚恐熱戰破之收器鎧以獻今從補國史實錄

六月以王晏權代高駢鎮安南

補國史謂駢及晏權皆云安南節度使按時安

南止有都護經畧招討使耳無節度使也舊王智興傳九子無晏權名實錄亦云命晏權代駢為節度而無月

日蓋闕漏也

十月高駢克安南

舊紀十月駢奏蠻寇悉平實錄九月駢奏殺戮都蠻統皈首遷朱道古及

斬首三千餘級十月丙申日下又云駢奏收復安南蠻寇遁散又云敗楊緝思段酋遷朱道古殺戮三萬餘級新紀十月高駢克安南按飯首遷即段酋遷字之誤也補國史收賊與敗緝思等共是一事實錄分在兩月不知其何所據也新南詔傳曰七年六月駢次交州戰數勝士酣鬪斬其將張銓李涯龍舉衆萬人降拔波風二壁緝思出戰敗還走城士乘之超堞入斬酋遷昵此諾眉上首三萬級安南平蓋因駢以六月至安南終言之耳安南實不以六月平也今從新舊紀

八年八月貶楊牧端州司馬

舊傳曰韋保衡作相又發牧陰事言前用嚴譔為江

西節度納賂百萬明年貶為端州司馬按是時保衡未作相舊傳誤今從實錄

九年八月高駢請以從孫潯代鎮交趾

補國史曰高公姪孫潯將先鋒

軍每遇陣敵身當矢石及高公內舉交代朝廷命潯節制交趾實錄但云高潯以下勒姓名於碑陰不云潯為節度使新傳曰駢之戰其從孫潯常為先鋒冒矢石以勸士駢從天平薦潯自代詔拜交州節度使按駢為金吾半歲始除天平今從補國史

十月庚午龐勛陷宿州

舊紀九月甲午勛陷宿州今從鄭樵彭門紀亂及新紀

丁丑陷徐州

舊紀九月乙未龐勛陷徐州殺節度使崔彥曾判官焦璐等賊令別將梁仵守宿州

又遣劉行及丁景琮吳迴攻圍泗州今從彭門紀亂及新紀舊彥曾傳曰九年九月十四日賊逼徐州十五日後每旦大霧十六日彥曾並誅逆卒家口十七日昏霧尤甚賊四面斬關而入實錄自勛知徐州出兵退至符離以後皆置於十一月今從彭門紀亂

劉行及入濠州因盧望回

舊紀實錄新紀濠州陷在十一月按濠本徐之屬郡勛始

得徐州則遣行及取之望回猶未及為備豈得至十一月今從彭門紀亂

十一月以康承訓等為徐州招討使

舊紀十年正月以神武大將軍王晏

權為武寧節度使晏權智興之從子也以右神策大將軍康承訓充徐泗行營都招討使凡十八將分董諸道之兵七萬三千一十五人正月一日進軍攻徐州又曰承訓大軍攻宿州賊將梁伍出戰屢敗乃授承訓義成軍節度使實錄九年十二月以右金吾大將軍康承訓為義成軍節度使充徐泗行營兵馬都招討使承訓不赴鎮以節度副使陳魴句當留後以王晏權為徐泗濠宿等州觀察使充徐州北面行營招討等使羽林將軍戴可師為徐州南面行營招討等使彭門紀亂新紀承訓等除招討使皆在十一月唐年補錄十一月庚申以

太原節度使康承訓為都統討徐州按庚申乃十二月一日承訓舊官亦非太原節度使補錄誤也今從彭門

新紀亂

敕使郭厚本

舊紀實錄作郝厚本今從彭門紀亂及舊傳

十二月賊陷都梁城執李湘郭厚本

舊紀十月賊攻泗州勢急令狐絢慮

失泗口乃令大將李湘赴援舉軍皆沒湘與都監郝厚本俱為賊所執送徐州令狐絢傳曰賊聞湘來援遣人致書于絢辭情遜順言朝廷累有詔赦宥但抗拒者三兩人耳旦夕圖去之即束身請命願相公保任之絢即奏聞請賜勛節鉞仍誡李湘但戍淮口賊已招降不得立異繇是湘軍解甲安寢去警徹備日與賊軍相對歡笑交言一日賊軍乘間步騎徑入湘壘淮卒五千人皆被生繫送徐州為賊蒸而食之湘與監軍郭厚本為龐

勦斷手足以徇於康承訓軍時浙西杜審權發軍千人與李湘約會兵大將翟行約勇敢知名浙軍未至而湘軍敗賊乃分兵立淮南旗幟為交關之狀行約軍望見急趨之十人並為賊所縛送徐州絢既喪師朝廷以馬舉代絢為淮南節度使辛譴傳曰湘率五千來援賊詐降敗于淮口湘與郭厚本皆為賊所執彭門紀亂曰勦以泗州堅守遣劉佶共謀攻取時淮南宣潤三道發兵戍都梁山舊城與泗州隔淮而已賊衆乃夜潛師渡淮及明而逼城濠州賊帥劉行及亦遣王弘立侵掠淮南於是合衆急攻官軍遂棄城出戰十一月三十日賊乃大敗官軍殺害二千人生降七八百人并虜其將李湘等咸送於徐州賊遂據有淮口斷絕驛路又曰賊既破戴可師令狐絢懼乃遣使誘諭約為奏請節旌續皇王寶運錄曰十一月二十九日浙西節度使杜審權差都頭翟行約將兵二千來救三十日行約領兵方欲入泗州又被賊奔來行約占山尋被圍合城中兵士無可出

救賊又開圍行約不知是計便走欲去而築着山下伏兵須臾被殺匹馬不餘賊遂圍淮口鎮有淮南都押衙李湘鎮將袁公弁領馬步三千人被圍從十一月三十日至十二月五日李湘束甲出軍被襲逐殺盡却入鎮者使暨降旗鎮內兵士老幼一萬餘人被劫驅送濠州郭厚本此時遇害今從續寶運錄

龐勛陷滁州和州

彭門紀亂光蔡山中草賊數百攻破滁州殺刺史高錫望歸附龐勛舊紀

十一月吳迴既執李湘乃令小將張行簡吳約攻滁州執刺史高錫望手刃之屠其城而去行簡又進攻和州刺史崔雍登城樓謂吳約云云遂剽城中居民殺判官張琢以琢浚城濠故也勛又令劉贄攻濠州陷之因刺史盧望回於迴車館望回鬱憤而死實錄閏月賊陷和州濠州明年三月又云勛遣張行簡攻滁州入城害刺史高錫望新紀十二月賊陷濠州和今陷濠州從彭門紀亂陷濠州和置執李湘下

閏月戴可師為王弘立所敗

續實錄曰正月十八日戴可師陷失賊遂山狂彭

門紀亂曰可師引兵三萬欲先奪淮口遂救泗州十二月十三日達明圍賊於都梁山下賊已就降而可師自恃兵強不為備賊將王弘立者將兵數萬人捷徑赴救奔突而前官軍潰亂遂為所敗可師并監使將校已下咸沒於陣於是龐勛自謂前無彊敵矣舊紀十二月可師與賊轉戰賊黨屢敗盡棄淮南之守十年正月以可師充曹州行營招討使時賊將劉行及吳迴攻開泗州可師乘勝救之屯於石梁驛賊退去可師追擊生禽行及賊保都梁城登城拜曰見與都頭謀歸順可師既知其窘乃退軍五里其城西面有水三面大軍賊乃夜中涉水而遁明早開城門唯病嫗數人而已王師入壘未整翌日詰旦重霧賊軍大至可師方大醉單馬奔出為虹縣人郭真所殺一軍盡沒賊將吳迴進軍復圍泗州又曰龐勛奏當道先發戍嶺南兵士三千人春冬衣今

欲差人送赴邕管鄂岳觀察使劉允章上書充龐勛聚徒十萬今若遣人達嶺表如戍卒與勛合勢則禍難非細尋詔龐勛止絕兼令江淮諸道紀綱捕之實錄可師敗繫於閏月下而亦云十二月壬申亦用紀亂之日也按紀亂上有臘月又云十二月十三日具下無閏月疑謂閏月十三日也然據續寶運錄閏月十一日辛讜離泗州十四日至揚州乞兵糧若於時可師在都梁則讜必不舍可師而詣揚潤也若讜出在可師敗後則令孤絢方自救不暇何暇救泗州若可師敗在正月則新紀十二月已除馬舉南面招討要之必在辛讜適揚潤之後故置於此

曹翔馬舉為徐州南北招討使

彭門紀亂作馬士舉今從新紀紀亂曰王晏權

數為賊所攻雖不敗傷亦時退縮朝廷復除隴州牧曹翔領充海節度使充北面都統招討等使又魏博元帥

何公遣行軍薛尤將兵三萬人犄角破賊曹翔軍於滕
沛魏博軍於豐蕭其衆都六七萬人又言賊寇海州壽
州皆敗又言辛讜救泗州雖繫正月之下蓋追敵以前
之事實錄二月以馬舉為淮南節度使充南面招討使
初康承訓率諸將正月一日進軍攻徐州不克賊圓壽
州王晏權數為賊所攻退縮不敢出戰乃以曹翔為充
海等州節度使充北面招討使魏博遣薛尤將兵三千
人犄角討賊賊衆攻海州戍兵擊之大敗康承訓率衆
屯於柳子之西皆承此而誤也新紀翔舉除南北招討
在十二月而無閏今因翔與魏博同討徐州而見之置
於歲末

何全皞遣薛尤將萬三千人討龐勛

彭門紀亂曰尤將三萬人并曹翔軍

都六七萬人實錄魏博奏請出兵三千人助討徐泗舊
紀魏博何弘敬奏當道點檢兵馬一萬三千赴行營姓

名雖誤今取其人數

十年四月辛讜迎糧入泗州

續寶運錄曰二月七日辛讜揀點驍勇領空船十二

隻搬糧二十日却到楚州四月六日離楚八日至斗山下是日二更後入泗州按正月二十七日讜迎米船九隻入泗州三月六日未應食盡復出又二十日却到楚州不應住四十五日然後離彼又上有二月十日授讜御史不應下云二月七日讜出搬糧疑是三月字也

官軍敗龐勛于柳子

實錄勛敗于柳子在五月蓋約奏到書之其他皆如此雖有月日不

可用今從

彭門紀亂

六月翰林學士承旨劉瞻同平章事

玉泉子聞見錄曰徐公商判醴以瞻

為從事商拜相命官曾不及瞻瞻出於羈旅以楊玄翼
樞密權重可倚以圖事而密諂聞者謁焉瞻有儀表加
以詞辯俊利玄翼一見悅之每玄翼歸第瞻輒候之由
是日加親熟遂許以內廷之拜既有日矣瞻即復謁徐
公曰相公過聽以某辱在門館幸遇相公登庸四海之
人孰不受相公之惠某故相公從事窮饑日加且環歲
矣相公曾不以下位處之某雖不佞亦相公之恩不終
也今已別有計矣請從此辭即下拜焉商初聞瞻言徒
唯唯而已迨聞別有計不覺愕然方欲遜謝瞻已疾趨
出矣明日內榜子出以瞻為翰林學士舊瞻傳劉瑑作
相以宗人遇之薦為翰林學士按瞻素有清節必不至
如玉泉子所云恐出於愛憎之說聞見錄又曰玄翼為
鳳翔監軍瞻即已為太原亞尹鄭從謹為節度使殊不
禮焉洎復入翰林而作相也常謂人曰吾在北門為鄭
尚書冷將息不復病熱矣從謹南海之命瞻所致也按
舊傳瞻自戶部侍郎承旨出為太原尹河東節度使瞻

為學士若非以罪謫恐不為少尹又舊紀咸通十二年十二月鄭從謹自宣武節度使為廣州在瞻驩州後故知玉泉子所記皆虛今所不取

八月康承訓攻徐州

舊紀實錄皆云八月康承訓攻柳

師大敗承訓退保宋州龐勛乘勝自率徐州勁卒併攻泗州留其都將許佶守徐州詔馬舉援泗州按弘立救柳子為承訓所敗兼於時弘立已死於泗州勛亦未嘗親攻泗州舊紀實錄誤也

九月朱邪赤心為前鋒

彭門紀亂云沙陀都頭朱邪赤

也亂誤

龐勛敗死

彭門紀亂曰初龐勛之求節也必希歲內得之於是間里小兒競歌之曰得節不得節不

過十二月即龐勛九年十月十七日作亂十年九月十
九日就戮通其閏月計之正一歲而滅按六月承訓知
勛掠毫宗即追之至斬縣得之恐未至十九日疑是
九日也新紀九月癸酉龐勛伏誅用彭門紀亂也
十月賜崔雍死舊紀八月和州防禦行官石侔等訟雍
罪其月賜自盡實錄訟在八月賜自盡

在十月
今從之

南詔傾國入寇

張雲咸通解圍錄曰十年十月南蠻衆
擊董春烏部落傾其巢窟春烏以其衆

保北柵俄而蠻掩至沐源川遂逼嘉州南自清谿關寇
黎雅張彭錦里耆舊傳曰十一年庚寅節度使盧僕射
耽冬雲南蠻數萬寇邊突破清谿關犯大渡河遂進陷
沉黎突邛崃直過雅邛按解圍錄新舊紀蠻入寇皆在
十年冬而彭獨以為十一年冬誤也新傳曰十年乃入
寇以兵綴清谿關密引衆伐木開道徑雪峨盛夏卒凍

死者二千人出沐源闕嘉州按蠻以十一月至沐源川
非盛夏新傳誤也實錄又曰驃信以十月三日梨善闡
每人只將米炒一斗隨身乃詔高駢乘其國內無兵備
進攻善闡以解衝突按駢時為郫州節度使不在安南
恐實錄誤也

十一年正月前瀘州刺史楊慶復

新傳云瀘州刺史楊慶錦里耆舊傳云嘉

州誤也今從解圍錄

康承訓貶蜀王傅

新傳曰宰相路巖韋保衡劾承訓討賊逗撓貪虜獲不時上功貶蜀王傅

分司東都按此時保衡未為相益以尚主之故上用其言故得擠承訓也

八月路巖譖劉瞻貶驩州

實錄新傳皆云巖志欲殺之賴幽州節度使張公素表論

瞻寬乃止按是時張允仲鎮幽州云公素恐誤也

十三年五月韋殷裕坐告郭敬述杖死

續寶運錄曰內作使郭敬述與

宰臣韋保衡張能順頻於內宅飲酒潛通郭妃荒穢頗甚每封進文書於金合內詐稱果子內連郭妃郭敬述外結張能順國子司業韋殷裕擬傾皇祚別立太子事泄遽加貶降五月十四日內榜子貶工部尚書嚴祁柳州刺史給事中李貺勤州刺史給事中張鐸滕州刺史左金吾大將軍李敬仲儋州司戶國子司業韋裕敕京兆府決痛杖一頓處死家資妻女沒官又貶敘州刺史韋君卿愛州崇平縣尉右僕射右羽林統軍張直方康州司馬續又貶駙馬于棕並扶會與韋保衡等同謀不軌事其月十七日又貶尚書左丞李當道州刺史吏部侍郎王諷建州刺史左常侍李都賀州刺史翰林承旨張錫封州司馬中書舍人封彥卿潮州司戶諫議大夫

楊塾新州司戶駙馬韋保衡雷州刺史又貶儋州澄邁縣尉又貶驩州長流百姓又賜自盡家貲沒官仍三族不許朝廷錄用其語雜亂無稽今從實錄

十四年五月路巖兼中書令

錦里耆舊傳十二年八月

邛州置定邊軍節度復制把大渡河脩邛崃關南路悉點檀丁子弟教之斫刺刀補義軍將主管教練兵士新傳巖至西川承蠻盜邊後巖力拊循置定邊軍於邛州扼大渡治故關取檀丁子弟教擊刺捕屯籍由是西山八國來朝以勞遷兼中書令按置定邊軍乃李師望耆舊傳新傳皆誤也

六月韋保衡斥王鐸蕭邁

舊傳曰保衡以楊牧路巖在中書不加禮接媒孽逐之按

牧獲罪時保衡未為相蓋保衡雖為學士懿宗寵任之故能譖牧也又曰公主薨自後恩禮漸薄按路巖于棕

王鐸蕭遘被擯皆在
公主薨後今從實錄

七月劉行深韓文約立普王儼

范質五代通錄梁李振
謂陝州護軍韓彞範曰

懿皇初升遐韓中尉殺長立幼以利其權遂亂天下今
將軍復欲爾邪彞範即文約孫也按懿宗八子僖宗第
五餘子新舊書不載長幼又不
言所終不言所殺者果何王也

庚辰立儼為太子

續寶運錄曰其日宰臣蕭鄴等直至
寢幄問疾上微道朕三字而止羣臣

不覺號哭失聲中外悉皆垂泣按是時宰
相韋保衡最在上蕭鄴不為相今不取

九月韓君雄賜名允中

舊傳作允忠實錄新
傳皆作允中今從之

僖宗乾符元年二月劉瞻為刑部尚書

玉泉子見聞錄
曰初瞻南遷無

問賢不肖一口皆為之痛惜殆將至京東西市豪俠共率泉帛募集百戲將送於城外瞻知之差其期而易路焉瞻為相亦無他才徒以路巖遭時嫉怒瞻為所排而人心歸向耳其實未足譚也按瞻以清慎著聞及懿宗暴怒瞻獨能不顧其身救數百人之死而玉泉子以為未足談不亦誣乎

八月崔彥昭為相不逐王凝

此出中朝故事曰彥昭代凝判鹽鐵半載而入相按

實錄彥昭不代凝為鹽鐵其餘則取之

十月鄭畋同平章事

舊畋傳曰乾符四年遷吏部侍郎尋降制可本官同平章事今從實

錄此年為相

十二月南詔攻雅州至新津牛叢豫焚民居

錦里耆舊傳咸通十

四年十一月五日雲南蠻寇再犯大渡河黃景復擊敗之十一月二十五日復攻大渡三十日蠻乘勝進收黎州十二月二十八日蠻來只到新津前後蜀州界左右便退竟不到城下按咸通十四年南詔寇西川事舊紀南詔傳唐年補錄唐錄備闕續寶運圖皆無之獨舊唐傳載之甚詳新書取之作南詔傳而實錄但云十二月西川奏南蠻入寇黎州刺史黃景復擊退之新紀但云十二月雲南蠻寇黎州蓋亦出於舊傳耳舊紀乾符元年冬南詔蠻寇西蜀詔河西河東山南西道東川徵兵赴援實錄乾符元年十月西川奏雲南蠻入寇十二月雲南蠻寇西川垣綽致書於牛叢欲求入覲河東山南西道及東川兵援之月末又云南蠻侵犯黎州而成都守禦無備殊不拒敵踰河越嶺洞無籬障賴積雪丈餘遂阻隔奔衝之勢又邛雅二州刺史望風奔遁蠻燒劫一空牛叢不曉兵失於探候而奏報差戾詔切責之蠻劫畧黎雅間破黎州入邛峽關掠成都閉三日蠻乃

去新紀乾符元年十二月雲南蠻寇黎雅二州河西河
東山南東道東川兵伐雲南按實錄咸通十四年十一
月七日路巖始移荆南八日牛叢始除西川而耆舊傳
蠻入寇皆叢任內事恐誤先一年也實錄新紀因此於
十四年十二月添雲南寇黎
州事實皆在乾符元年冬也

王仙芝起長垣

實錄二年五月仙芝反於長垣按續實

將軍兼海內諸豪都統傳檄諸道檄未稱乾符一
年正月三日則仙芝起必在二年前今置於歲末

二年正月高駢先開成都府

錦里耆舊傳曰郾州節度使高相公駢乘急詔除授

劔南西川節度副大使乾符元年正月二十一日行李
到劔州先遣使走馬開城門並令放出百姓二月十六
日至府豁開城門並放人出今從實錄置今年又劔州
至成都止十二程駢正月二十一日自劔州遣使走馬

開城門二月十六日始至府下又云駢三十日到上按長歷二月小無三十日蓋二十六日誤為二月十六日也

駢奏勒還長武等兵

舊紀此奏在元年十二月實錄在二月今因駢開成都門言之

田令孜為神策中尉

舊本紀此年正月令孜為右軍中尉新傳云帝即位擢為左神策中

尉舊傳但云神策中尉今從之

上時年十四專事遊戲

續寶運錄曰上是年十五歲中朝故事曰僖宗皇帝以咸通三

年降誕十四年七月十九日即位年十二按舊紀亦云僖宗咸通三年五月八日生於東內即位年十二今從之

駢斬黃景復

者舊傳曰乾符元年三月十五日處置前黎州刺史充大渡河把截制置土軍都知

兵馬使黃景復實錄乾符二年三月駢

奏斬景復今事從者舊傳年從實錄

四月王郢等作亂

新紀浙西突陳將王郢反五月遣右龍武大將軍宗皓討之按四年二月

郢執魯寔始命皓討之置此誤也程匡柔唐補紀曰六

月浙西突將王郢反聚黨萬衆燒劫蘇常三年正月貶

蘇州刺史李繪以郢亂棄城故也舊紀二年四月海賊

王郢攻剽浙西郡邑實錄乾符三年二月浙西奏突陳

將王郢等六十九人劫庫兵為亂三月浙西奏王郢聚

衆萬人攻陷州縣續實錄元年王郢於兩浙叛敕差


山北兵士討之不逾月而尅

乃組頸于闕下今從舊紀

五月蕭倣薨

舊傳曰俄而盜起河南內官握兵王室濁亂倣氣勁論直同列忌之罷知政事出為

廣州刺史嶺南節度使遇亂不至京師而卒舊紀三年
春正月己卯朔倣以病免罷為太子太傅新紀此月蕭
倣薨新傳亦云卒于位為嶺南節
度使前舊紀傳皆誤今從實錄



資治通鑑考異卷二十三

欽定四庫全書

史部

資治通鑑考異卷二十四

詳校官修撰_臣錢 榮

洗馬_臣王坦修覆勘

總校官庶吉士_臣張能照

校對官編修_臣裴 謙

謄錄舉人_臣洪道濟

謄錄監生_臣鄭 嶠

欽定四庫全書

資治通鑑考異卷二十四

宋司馬光撰

唐紀十六

乾符三年七月宋威擊王仙芝破之

實錄去年十二月宋威自青州與副

使曹全

最進軍

擊王仙芝

仙芝敗走

按仙芝

若以去年

十二月敗走

中間半年豈能移處蓋實因威除招討使

連言之其實仙芝敗在

此月不在十二月也

十二月鄭畋請以崔安潛代宋威張自勉代曾元裕

實錄

雖於此月載敗所上書亦不言行與不行新紀遂於此言安潛為諸道行營都統李琢為招討草賊使自勉副之按明年威元裕為使副猶如故新紀誤也

安南戍兵逐李瓚

新紀在四年十一月今從實錄

黃巢言五千餘眾安所歸

仙芝巢初起時云數月間眾至數萬至此纔有五千者蓋

烏合之眾聚散無常耳

王仙芝黃巢分道而去

王坤鷲聽錄曰乾符四年丁酉仲夏天示彗星草寇黃巢尚君

長奔突即五年戊戌之歲狂寇王仙芝起自鄆封而侵汝鄭即大寇黃巢尚君長並賊帥之徒黨僅一千餘人攻陷汝州云云又曰黃巢望閩廣而去仙芝指鄆州南行尚君長期陳蔡間取羣凶之願三千餘寇屬仙芝君

長二千餘人屬黃巢所管明年二月仙芝陷鄂州巢陷
鄭州則非巢趣閩廣仙芝趣郛也王坤此書年月事迹
差舛尤多但擇其可信者取之

四年二月南詔國號鶴拓亦號大封人

徐雲虔南詔錄
曰南詔別名鶴

拓其後亦自稱大封
人是以封為國號也

四月黃巢尚讓保查牙山

舊紀四年三月巢陷郛州七
月入查牙山與王仙芝合五

年二月君長仙芝皆死尚讓以兄遇害大掠淮南舊傳
五年八月王鐸斬王仙芝先是尚君長弟讓以兄奉使
見誅率部衆入查牙山黃巢黃揆昆仲八人率盜數千
依讓按實錄乾符二年仙芝陷曹濮巢已起兵應之三
年十二月招討副都監楊復光奏草賊尚讓據查牙山
官軍退保鄧州四年四月黃巢引其衆保查牙山其年

冬君長乃死驚聽錄巢與仙芝俱入蘄州以仙芝獨受
官而怒毆仙芝傷面由是分隊時君長亦在座非仙芝
死後巢方依讓也又按舊紀仙芝死後王鐸始為都統
討賊而舊傳云王鐸斬仙芝又先云殺張璘乃陷廣州
先云陷華州方攻潼關敎
事顛錯不倫今從實錄

五年二月李克用殺段文楚據雲州

趙鳳後唐太祖紀
年錄曰乾符三年

河南水災盜寇蜂起朝廷以段文楚為代北水陸發運
雲州防禦使以代支謨時歲荐饑文楚削軍人衣米諸
軍咸怨太祖為雲中防邊督將部下爭訴以軍食不充
請具聞奏邊校程懷信康君立等十餘帳日譁於太祖
之門請共除虐帥以謝邊人眾因大譟擁太祖上馬比
及雲中眾且萬人城中械文楚出以應太祖後唐閔帝
時史官張昭遠撰莊宗功臣列傳曰康君立為雲中牙
校事防禦使段文楚時天下將亂代北仍歲阻饑諸部

豪傑咸有嘯聚邀功之志文楚法令稍峻軍食轉餉不
給戍兵咨怨雲州沙陀兵馬使李盡忠私謂君立等曰
段公儒者難與共事方今四方雲擾皇威不振丈夫不
能於此時立功立事非人豪也吾等雖擁部衆然以雄
勁聞於時者莫若李振武父子官高功大勇冠諸軍吾
等合勢推之則代北之地旬日可定功名富貴事無不
濟也時武皇為沙陀三部落副兵馬使在蔚州盡忠令
君立私往圖之曰方今天下大亂天子付將臣以邊事
歲偶饑荒便削儲給我等邊人焉能守死公家父子素
以威惠及五部當共除虐帥以謝邊人武皇曰予家尊
在振武萬一相逼俟予稟命君立曰事機已泄遲則變
生咸通十三年十二月盡忠夜帥牙兵攻牙城執文楚
及判官柳漢璋陳韜等繫之於獄遂自知軍州事遣君
立召太祖於蔚州是月太祖與退渾突厥三部落衆萬
人趨雲中十四年正月六日至關雞臺盡忠遣監軍判
官符印請太祖知留後事七日盡忠械文楚漢璋等五

人送鬪雞臺軍人亂食其肉九日太祖權知留後府牙
受上三軍表請授太祖大同防禦使懿宗不悅時已除
盧簡方代文楚未至而文楚被害實錄乾符元年十二
月李克用殺大同軍防禦使段文楚自稱防禦留後塞
下之亂自茲始矣薛居正五代史君立傳皆與莊宗列
傳同惟削去李盡忠名但云君立與薛鐵山程懷信王
行審李存璋等謀悉以盡忠語為君立之語云君立等
乃夜謁武皇言曰方今天下大亂云云衆因聚譟擁武
皇比及雲州衆且萬人師營鬪雞臺城中械文楚以應
武皇之軍既收城推武皇為大同軍防禦留後衆狀以
聞舊紀咸通十三年十二月李國昌小男克用殺雲州
防禦使段文楚據雲州自稱防禦留後乾符五年正月
沙陀首領李盡忠陷遮虜軍實潞遣康傳圭率土團二
千屯代州將發求賞呼噪殺馬步軍使鄧虔有唐末三
朝見聞錄者不著撰人姓名專記晉陽事其書云乾符
五年戊戌實潞自前守京兆尹拜河東節度使在任便

值大同軍變殺防禦使段文楚正月二十六日軍於石
窰二十七日到白泊二十九日至靜邊軍三十日築却
四面城門二月一日在城將士三人共賞絹一匹監軍
使姜仇判官聞奏李盡忠等准詔各賞馬一匹銀鞍轡
一副銀三錠銀碗一枚絹一束錦二匹紫羅三匹諸軍
將銀碗絹等三日李盡忠却入四日雨而馬步五萬餘
人城四面下營五日又賞土團牛酒六日監軍使送牌
印與李九郎七日城南門樓上繫縛下段尚書柳漢璋
雍侍御陳韜等四人尋分付軍兵於關難臺西副却又
令馬軍踐踏却骸骨八日李九郎被土國馬步軍約二
千人持弓刀送上與舊紀五年事徵合實錄亦頗采之
云五年正月壬戌實濟奏沙陀首領李盡忠寇石窰白
泊至靜邊軍二月奏李盡忠求賞詔賞馬一匹銀鞍勒
綿絹等按莊宗列傳舊紀克用殺文楚在咸通十三年
十二月歐陽修五代史記取之太祖紀年錄在乾符三
年薛居正五代史新沙陀傳取之見聞錄在乾符五年

二月新紀取之惟實錄在乾符元年不知其所据何書也克用既殺文楚豈肯晏然安處必更侵擾邊陲朝廷亦須發兵徵討而自乾符四年以前皆不見其事唐末見聞錄敘月日今從之

以盧簡方為大同防禦使

舊紀咸通十三年七月以前義昌節度使盧簡方為太僕

卿十二月以振武節度使李國昌為雲州刺史大同軍防禦等使國昌稱病辭軍務乃以太僕卿盧簡方為雲州刺史充大同軍防禦等使上召簡方於思政殿謂之曰卿以滄州節制屈居大同然朕以沙陀退渾撓亂邊鄙以卿曾在雲中惠及部落且忍屈為朕此行具達朕旨安慰國昌勿令有所猜嫌也十四年正月辛未以雲朔暴亂代北騷動賜盧簡方詔曰近知大同軍不安殺害段文楚李國昌小男克用主領兵權又曰若克用暫勿主兵務束手待朝廷除人則事出權宜不足猜慮若便圖軍柄欲奄大同則患繫久長故難依允料國昌輸

忠効節必當已有指揮簡方準詔諭之國昌不奉詔乃
詔太原節度使崔彥昭幽州節度使張公素出師討之
三月以簡方為振武節度使至嵐州辛實錄乾符元年
十二月簡方除大同二年正月賜詔亦不云使彥昭公
素討之蓋舊紀實錄各隨段文楚死之後載除簡方及
詔書使事相接續耳恐皆未足據也舊紀所云太原幽
州討之蓋因敘後來事實錄所以不取者方知招諭未
必攻討也唐末見聞錄又云五年四月敕除簡方振武
節度使五月辛實錄亦在五年而云六月
卒蓋約奏到之月耳今從三朝見聞錄

曾元裕破王仙芝斬之

實錄元裕奏大破王仙芝於黃
梅縣殺戮五萬餘人追至曹州

南華縣斬仙芝傳首京師舊紀二月王仙芝餘黨攻江
西招討使宋威出軍屢敗之仍宣詔書諭仙芝仙芝致
書於威求節鉞威偽許之仙芝令其大將尚君長蔡溫
玉奉表入朝威乃斬君長溫玉以徇仙芝怒急攻洪州

陷其郛宗威赴援與賊戰大敗之殺仙芝傳首京師君
長弟讓與黃巢大掠淮南舊傳曰齊克讓為兗州節度
使以本軍討仙芝仙芝懼引眾歷陳許襄鄧無少長皆
虜之眾號三十萬三年七月陷江陵十月又遣將徐唐
莒陷洪州時仙芝表請符節不允以宗威為荆南節度
招討使楊復光為監軍復光遣判官吳彥宏諭以朝旨
釋罪別加官爵仙芝乃令尚君長蔡溫王楚彥威相次
詣闕請罪且求恩命時宋威害復光之功並擒送闕敕
於狗脊嶺斬之賊怒悉精銳擊官軍威軍大敗復光收
其餘眾以統之朝廷以王鐸代為招討五年八月收復
荊州斬仙芝首獻於闕下新傳黃巢自蘄州與王仙芝
分其眾尚君長入陳蔡巢北掠齊魯眾萬人入鄆州殺
節度使薛崇進陷沂州繇蔡保查岢山引兵復與仙
芝合圍宋州會自勉救兵至仙芝解而南度漢攻荆南
陷之賊不能守巢攻和州未克仙芝自圍洪州取之使
徐唐莒守進破朗岳遂圍潭州觀察使崔瑾拒却之乃

向浙西擾宣潤不能得所欲身留江西趣別部還入河
南帝詔崔安潛歸忠武復起宋威曾元裕以招討使還
之而楊復光監軍復光以詔諭賊仙芝遣尚君長等詣
闕請罪又遺威書求節度威陽許之上言與君長戰擒
之復光因言其降命侍御史與中人即訊不能明卒斬
之仙芝怒還攻洪州入其郭威自將往救敗仙芝於黃
梅斬五萬級獲仙芝傳首京師當此時巢方圍亳州未
下君長弟讓帥仙芝潰黨歸巢新舊傳敘賊所經歷皆
不同又云宋威殺
仙芝今皆從實錄

黃巢改元王霸

續寶運錄乾符元年黃巢聚眾於會稽反建元曰王霸元年舊傳先是尚君長

弟讓以兄見誅率眾入查牙山黃巢黃揆昆仲八人率
盜數千依讓月餘眾至數萬陷汝州虜刺史王獠大掠
關東官軍加討屢為所敗其眾十餘萬尚讓乃與羣盜
推巢為王曰衝天大將軍仍署官屬蕃鎮不能制新傳

曰尚君長弟讓率仙芝潰黨歸巢推巢為王號衝天大將軍署拜官屬驅河南山南之民十餘萬掠淮南建元王霸今從之

巢請降詔以為右衛將軍竟不至

舊傳及王仙芝敗巢東攻亳州不下乃襲

破沂州據之仙芝餘黨悉附焉寶錄巢自稱黃王建元王霸連為王師所敗諸天平乞降除右衛將軍復叛去自是兵不能制新傳曰曾元裕敗賊於中州死者萬人帝以宋威殺尚君長非是且討賊無功詔還青州以元裕為招討使張自勉為副巢破考城取濮州元裕軍荆襄援兵阻更拜自勉東北面行營招討使督諸軍急捕巢巢方掠襄邑雍邱詔滑州節度使李嶧壁原武巢寇葉陽翟欲窺東都會左神武大將軍劉景仁以兵五千援東都河陽節度使鄭延休兵三千壁河陰巢兵在江西者為鎮海節度使高駢所破寇新鄭邙襄城陽翟者

為崔安潛逐走在浙西者為節度使裴瑊斬二長死者甚眾巢大沮畏乃詣天平軍乞降詔授巢右衛將軍巢度藩鎮不一未足制已即叛去轉寇浙東執觀察使崔瑋與實錄先後不同今從實錄

四月以盧簡方為振武節度使李國昌為大同節度使

唐末見開錄遮虜軍及代州告急竇尚書差回鶻五百騎邊界巡檢至四月三日進發至五里堠北副將康叔譚恃酒叛逆射損都將趙歸義斫損將判官閻建弘擒縛入府尚書令下於衙南門全家處斬使司差副兵馬使趙元掠領馬軍進發閻建弘遞送海西當月內有勅送節到除前大同軍防禦使盧簡方充振武節度使除振武節度使李尚書充大同軍節度使實錄云戊辰以簡方為振武國昌為大同蓋誤以康叔譚作亂之日為簡方等建節之日也新沙陀傳曰李克用既殺段文楚諸校共丐克用為大同防禦留後不許發諸道兵進捕

諸道不甚力而黃巢方引兵渡江朝廷度未能制乃赦之以國昌為大同軍防禦使國昌不受命詔河東節度使崔彥昭幽州張公素共擊之無功據此則是大同防禦使非節度也薛居正五代史紀曰武皇殺段文楚諸將列狀以聞請授武皇旄鉞朝廷不允徵諸道兵以討之乾符五年黃巢渡江其勢滋蔓天子乃悟其事以武皇為大同軍節度使檢校工部尚書是克用為大同節度使非國昌實錄國昌傳及獻祖紀年錄舊唐本紀俱不言國昌為大同節度使獨實錄於此言之下五月又云國昌殺監軍不肯代必有所據蓋國昌父子俱不肯受代朝廷以為用國昌代克用必無違命故徙國昌為大同節度而以盧簡方鎮振武二人竟不受命故簡方不得赴鎮而死於嵐州

國昌亦未嘗赴大同也

崔澹等議南詔和親

實錄置澹議於二月至四月又云南詔遣酋望趙宗政來朝且議和

好今因盧鄭
爭蠻事置此

五月鄭畋盧攜罷相

舊紀六年五月賊圍廣州與李岩崔瑒書求天平節錢畋攜爭論於

中書辭語不遜俱罷分司畋傳曰五年黃巢東渡江淮
衆百萬所經屢陷郡邑六年陷安南府據之致書與浙
東觀察使崔瑒求郢州節鉞瑒言賊勢難圖宜因授之
以絕北顧之患天子下百僚議初黃巢之起也宰相盧
攜以浙西觀察使高駢素有軍功奏為淮南節度使令
扼賊衝尋以駢為諸道行營都統及崔瑒之奏朝臣議
之有請假節以紓患者畋採羣議欲以南海節制廉之
携以始用高駢欲其立功以圖勝曰高駢將略無雙淮
北甲兵甚銳今諸道之師方集最爾纖冠不足平珍何
事捨之示怯而令諸軍解體耶畋曰巢賊之亂本因饑
歲人以利合乃至實繁江淮以南荐食殆半國家久不
用兵皆忘戰所在節將閉門自守尚不能支不如釋咎

包容權降恩澤彼本以饑年利合一遇豐歲孰不懷思鄉土其衆一離則巢賊几上肉耳若此際不以計攻全恃兵力恐天下之憂未艾也羣議然之而左僕射于琮曰南海有市舶之利歲貢珠璣如令妖賊所有國藏漸當廢竭上亦望駢成功乃依携議及中書商量制敕畋曰妖賊百萬橫行天下高公遷延玩寇無意翦除又從而保之彼得計矣國祚安危在我輩三四人畫度公倚淮南用兵吾不知稅駕之所矣携怒拂衣而起染袂於硯因投之僖宗聞之怒曰大臣相詬何以表儀四海二人俱罷政事携傳曰五年黃巢陷荆南江西外郭及虔吉饒信等州自浙東陷福建遂至嶺南陷廣州殺節度使李宥遂抗表求節鉞初王仙芝起河南携舉宗威齊克讓曾克等將略用為招討使及宗威殺尚君長致賊充斥朝廷遂以宰臣王鐸為都統携深不悅浙帥崔瑋等上表請假黃巢廣州節鉞上令宰臣議携以王鐸為統帥欲激怒黃巢堅言不可假賊節制止授率府率

而已與同列鄭畋爭論投硯於地由是兩罷之實錄五年五月丙申朔是日宰臣鄭畋盧攜議南蠻事携請降公主通和畋固爭以為不可抗論是非携怒拂衣而起袂染於硯因投而碎之丁酉以畋携並為太子賓客分司注云舊史洎雜說皆云畋携議黃巢節制忿爭賜罷而鄭延昌撰畋行狀乃云議蠻事無可證之然當時所述恐不謬又畋傳曰時黃巢攻陷江浙上表乞節鉞畋與同列盧攜謀議攻討及拔用將帥事多異同又南詔蠻請降公主和好畋因爭以為不可遂抗論之乃與携俱罷相又携傳曰携人質甚陋語亦不正與鄭畋俱李翱之外孫及同輔政議論不協初王仙芝起河南携舉宗威齊克議曾充等有將略用為招討使討賊皆無功致賊充斥又主高駢之請欲以公主和南詔蠻鄭畋執之以為不可帝前忿爭由是兩罷之舊紀六年五月賊圍廣州仍與廣南節度使李宥浙東觀察使崔瑋書求保薦乞天平節鉞瑋宥上表論之宰相鄭畋盧携爭論

於中書詞語不遜俱罷為太子賓客分司東都按新舊傳舊紀皆以畋遊罷相在六年實錄新紀表在此年五月實錄新書皆自相矛盾然宋氏多書知二人罷在五月必有所据今從之

李國昌不受代土團兵馬鄧虔

唐末見聞錄五月振武損却別敕不受除替李

尚書收却遮虜軍進打寧武及岢嵐軍代州告急二十
二日指揮在府三城排門差夫一人齊掘四面壕塹盧
尚書發赴振武至嵐州身薨二十四日拜都押衙康傳
圭充代州刺史又發太原晉陽兩縣點到土團子弟一
千人往代州屯駐至城北卓隊不發索出軍優賞差馬
步都虞侯鄧虔安慰尋被弔却床尸柩入府尚書監
軍自出安慰定每人各給錢三百文布一端差押衙田
公鐸給散不放却回便被請將充都將發赴軍前使司
有勝借商人助軍錢五萬貫文實錄五月李國昌殺監
軍使不肯受代起兵進打寧武及岢嵐軍代州出兵禦

之始國昌遣克用以兵襲大同三軍表克用為留後朝廷不允乃以國昌命之欲以其子無能拒也時國昌貪其土地欲父子分統故拒命馬實錄六月乙丑朔嵐州奏新除振武節度使盧簡方卒以太原府都押衙康傳主為代州刺史發太原晉陽土團十人戍代州至城北卓隊不發索優賞馬步都虞候鄧虔安慰為其衆殺之節度使竇滌自出撫慰乃定初太原府帑空竭每有賞賚必利民家至是尤窘迫乃榜借商人助軍錢五萬此皆約唐末見聞錄為之而後其月日以象奏到之時耳唐末見聞錄又云六月十一日左散騎常侍支謨奉敕到府充大同軍制置使兼攝河東節度副使軍前同指揮事此謂到府之日而實錄云甲戌以謨為制置使甲戌乃六月十日亦誤也

十二月李鈞與李克用戰敗死

舊紀河東節度使崔李康與北面行營招討使

李鈞與沙陀李克用戰于岢嵐軍之洪谷王師大敗鈞中流矢而卒戊戌至代州昭義軍亂為代州百姓所殺殆盡此年實錄略同廣明元年八月實錄河東奏昭義節度使李鈞為猛虎軍所殺又曰詔統本道兵由雁門出討雲州與賊戰敗歸為其下殺之新紀庚辰崔季康李鈞及李克用戰於洪谷敗績薛居正五代史紀曰乾符六年春朝廷以昭義節度使李鈞充北面招討使將上黨太原之師過石嶺關屯于代州與幽州李可舉會赫連鐸同攻蔚州獻祖以一軍禦之武皇以一軍南遮虜城以拒李鈞是冬大雪弓弩絃折南軍苦寒臨戰大敗奔歸代州李鈞中流矢而卒唐末見聞錄曰十九日崔尚書發往岢嵐軍請別敕賈敬嗣大夫權兵馬留後觀察判官李劬權觀察留後昭義節度使李鈞領本道兵馬到代州軍變被代州殺戮並盡捉到李鈞殘軍潰散取鷄鳴谷各歸本道按昭義軍變必非李鈞所為代州百姓捉到李鈞不知如何處之今從舊紀

六年正月高駢將張璘梁續

舊紀張璘作張麟新紀傳實錄作璘今從舊高駢黃

巢傳及唐年補錄妖亂志唐補紀續寶運錄舊紀梁續作梁續今從衆書

降畢師鐸等

郭延誨妖亂志曰初黃巢將蹂踐淮甸委師鐸為先鋒攻脅天長累日不克師鐸之

志沮焉及巢北向師鐸遂降勃海按舊師鐸傳駢敗巢於浙西皆師鐸之効故置於此

二月辛巳李侃為河東節度使

唐末見開錄三十日安慰使到府除侃充河東

節度使實錄因云庚寅除侃誤也

四月王鐸為荆南節度使招討都統

舊紀五年二月鐸請自督衆討賊天

子以宗威失策殺君長乃以鐸檢校司徒兼侍中門下侍郎江陵尹荆南節度使充諸道兵馬都統舊傳四年

賊陷江陵楊知溫失守宗威破賊失策朝議統率盧携稱高駢累立戰功宜付軍柄物議未允鐸廷奏臣願自率諸軍盪滌羣盜朝議然之五年以鐸守司徒門下侍郎同平章事兼江陵尹荆南節度使充諸道行營兵馬都統今從實錄及新紀表

五月黃巢上表求廣州節度使

續寶運錄曰黃巢先求廣府兼使相朝廷不與

黃巢夏初兵屯廣南累候敕旨不下遂恣行攻劫黃巢夏六月上表稱義軍百萬都統兼韶廣等州觀察處置等使末云六月十五日表秋遣內侍仇公度齎手詔并廣南邕府安南安東等節度使指揮觀察使開國公食邑五百戶官告六通又賜節度將吏空名尚書僕射官告五十通九月二十日仇公度到廣州至十月一日巢與公度雜匹段藥物等五馱表函一并所賜官告並却付公度表末云廣明元年十月一日上表公度等其年

宰相請除巢率府率

舊紀五月賊圍廣州仍與廣南節度使李迢浙東觀察使崔瑋書求

十月二十九日至京如實運錄所言則是廣明元年十月一日巢猶在廣州也按其月巢已入長安今從舊紀保薦乞天平節鉞迢瑋上表論之實錄迢瑋上表論請詞甚懇激乃詔公卿集議巢又自表乞廣州節度安南都護巢自春夏其衆大疫死者十三四欲據有嶺表永為巢穴乃繼有是請左僕射于琮議云云時朝廷倚高駢成功不允其奏乃議除官或云以正貲將軍廩之宰相亦沮其議乃除率府率舊巢傳曰時高駢鎮淮南表請招討賊許之議加都統巢乃渡淮偽降于駢駢遣將張潏率兵受降于天平鎮巢禽潏殺之因虜其衆尋南陷湖湘遂據交廣託崔瑋奏乞天平節度朝議不允又乞除官時宰相鄭畋與樞密使楊復恭欲請授司正貲將軍盧勣駁其議請授率府率如其不受請以高駢討之新巢傳曰有詔高駢為諸道行營都統巢進寇廣州

詔李迢書求表為天平節度又曾崔瑗言於朝宰相鄭畋欲許之盧携田令孜執不可巢又乞安南都護廣州節度使書聞右僕射于琮議云云乃拜巢率府率舊盧携傳亦皆以為携議授巢率府率按此時携已罷相今從實錄

九月巢陷廣州殺李迢

驚聽錄曰據李迢在寇復併燕海隅又陷桂州次攻湖南屯衡

州方知王仙芝已山東沒陳又尚君長生送咸京遂召李迢怒而躡害新紀十一月辛酉黃巢陷江陵殺李迢新傳曰其十月巢據荆南脅李迢草表報天子迢不可巢怒殺之北夢瑣言曰黃巢入廣州執李迢隨軍至荆州令迢草表迷其所懷迢曰某骨肉滿朝世受國恩腕即可斷表終不為巢於江津害之今從實錄

十月巢陷潭州劉漢宏大掠江陵

舊紀廣明元年二月巢陷潭州王鐸棄江

陵奔襄陽漢宏大掠實錄閏月湖南奏黃巢賊衆自衡
永州下十月二十七日攻陷潭州新巢傳曰廣明初賊
自嶺南寇湖南諸郡攻潭州陷之舊巢傳巢欲據南海
之地坐邀朝命是歲自春及夏其衆大疫死者十三四
衆勸請北歸以圖大利巢不得已廣明元年北踰五嶺
犯湖湘江浙按舊紀傳皆云廣明元年敗王鐸今月日
從實錄事從舊書人據舊紀傳則劉漢宏本王鐸將鐸
去而漢宏留江陵大掠遂為盜也實錄用之而於鐸奔
襄陽下漆先是字若鐸在江陵漢宏時為羣盜安能入
其城大掠僭使漢宏先曾寇掠江陵與黃巢事了不相
干何必言後半月餘賊衆乃據其城也吳越備史云漢
宏本兗州小吏領本州兵禦巢寇遂殺將首劫輜重而
叛後命前濠州刺史崔錯招降之据此則漢宏本羣盜
也新傳用之而云鐸招降之或者漢宏本羣盜中間降
鐸為部將鐸去江陵漢宏復大掠為
盜其後又降於崔錯遂為唐臣也

廣明元年正月侯昌業上疏極諫賜死

續寶運錄云司天少監侯昌業

上疏其略曰陛下不納李蔚杜希教之諫又曰臣乃明
祈五道暗祝冥官悚息於班列之中願早過於閭浮之
世又曰受爵不達於有德之君立戰每佐於無道之主
又曰不望堯舜之年得同先帝之日又曰明取尹希復
指揮暗策王士成進狀強奪波斯之寶貝抑取茶店之
珠珍渾取匱坊全城般運又曰莫是唐家合盡之歲為
復是陛下壽足之年又曰伏惟陛下鑒傳戲賞救接蒼
生於殿內立揭諦道場以無私財帛供養諸佛用資世
祿共力攘災表奏聖上龍威震怒侍臣驚悸宣徽使宣
云侯昌業付內侍省候進旨翌日午時又內養劉季遠
宣口敕云侯昌業出自寒門擢居清近不能修慎妄奏
閑詞訛謗萬乘君王毀斥百辟卿士在我彛典是不能
容其侯昌業宜賜自盡北夢瑣言曰唐自廣明後閹人
擅權置南北廢置使軍容田令孜有回天之力中外側

目而王仙芝黃巢剽掠江淮朝廷憂之左拾遺侯昌業上疏極言時病留中不出命於仗內戮之後有傳侯昌業疏詞不合事體其末云請開揭諦道場以銷兵厲似為庸僧偽作也必若侯昌業以此識見犯上宜其死也今從之

上好鬪雞賭鵝

新田令攷傳曰帝沖騷喜鬪鵝一鵝至直五十萬錢按鵝非可鬪之物又一鵝

至直五十萬錢亦恐失實新傳誤也今從續寶運錄

三月高駢為諸道行營都統

續寶運錄載駢上表及答詔云今以卿為諸道都統

應行營將士兵馬悉受指揮詔旨未到之間朝廷猜貳續策却不許行軍只令固守封疆不得擅行征討於是高駢乃引淮水繞江都城三重坐甲不討黃巢自此轉盛舊紀傳王鐸出鎮荆南亦為諸道行營都統而實錄

及新紀表皆云為南面行營都統舊紀乾符四年六月以駢為鎮海節度使江西招討使六年十月以駢為淮南節度使江南行營招討使廣明元年三月朝廷以鎮統衆無功乃授駢諸道兵馬行營都統駢傳四年為鎮海節度使尋授諸道兵馬都統六年冬徙淮南節度使兵馬都統如故盧摶傳曰及王鐸失守罷都統以高駢代之實錄五年六月駢移鎮海六年正月以駢為諸道行營兵馬都統仍賜詔如寶運錄所載者八月駢上表亦如之十月駢徙淮南依前充都統按駢表請追郎幼復備守浙西則是在鎮海時也詔云周旋六鎮則是駢已移淮南後也六鎮謂安南天平西川荆南鎮海淮南也又詔云今以卿為諸道都統則似移淮南後方為都統也疑駢在浙西止為招討使既數破巢軍乃以滅巢為已任上表請布置諸軍自攻巢於廣州及王鐸敗盧摶遂以駢代之摶欲重其權故為諸道都統若駢先為諸道都統鐸但為南面都統則鐸已在駢統下可以指

揮表不須云乞降救指揮鐸也且鐸自宰相都督諸將討賊故立都統之名不應同時有兩都統也其在浙西領江西招討使者時黃巢方掠虔吉饒信故也今從舊紀及盧摯傳

四月李琢為蔚朔等節度使

琢作琢者誤也

五月張潏戰死

舊紀是歲春末賊在信州疫癘其徒多喪淮南將張潏急擊之賊懼以金啗潏

仍致書高駢乞保明歸國駢信之許求節鉞時昭義武寧義武等軍兵馬數萬赴淮南駢欲收功於已乃奏賊已將珍滅不假諸道之師並遣還淮北賊知諸軍已退以求節鉞不獲暴怒與駢絕請戰駢怒令張潏整軍擊之為賊所敗臨陣殺潏賊遂乘勝渡江攻天長六合等縣駢不能拒但自固而已朝廷聞賊復振大恐高駢傳曰廣明元年夏黃巢自嶺表北趨江淮由采石渡江潏勒兵天長欲擊之黃巢傳云巢乃渡淮偽降於駢駢遣

將張潞率兵受降于天長鎮巢擒潞殺之實錄五月潞已為巢所殺七月巢乃過江其言潞所以死與舊紀同新紀傳皆與實錄同据舊傳則潞死在江北也舊紀及實錄新紀傳潞死在江南也按潞既死巢又陷睦州婺州宣州然後渡江潞死在江南是也

六月陳敬瑄至成都

錦里耆舊傳云敬瑄九月二十五日上任按實錄敬瑄除西川在三

月庚午又雲南事狀敬瑄與布燮以下牒云某謬膺朝寄獲授藩條以六月八日到鎮上訖今從之

李琢執傳文達

實錄六月李國昌遣文達守蔚州七月云李琢赫連鐸奏破沙陀於蔚州降傅

文達等薛居正五代史記武皇令軍使傅文達起兵於蔚州高文集等縛送李琢按國昌時在蔚州何必令文

達守之今

從薛史

詔許南詔和親

實錄六月丙申陳敬瑄奏請遣使和蠻丁酉中書奏請令百官集議甲辰百官

議定壬子中書奏遣使按敬瑄此月八日上丙申乃十四日也奏報豈能遽至今不取新傳先是南詔知蜀彊故襲安南陷之會四川節度使陳敬瑄申和親議時盧携復輔政與立盧瑑皆厚高駢乃議通和今從雲南事狀雲南事狀又曰中書奏玄宗冊蒙歸義為雲南王其子閣羅鳳降於吐蕃其孫異牟尋却歸朝廷自請改雲南王賜號南詔德宗從之至曾孫蒙豐祐杜悰奏以入朝人多減之後索質子漸為侮慢卷末載陳敬瑄與雲南書牒或稱鶴拓或稱大封人雲南事狀不著撰人名似是盧携奏草也

七月黃巢圍天長高駢不敢出兵

舊駢傳駢怨朝議有不附己者欲賊縱橫

河洛令朝廷聳振則從而誅之大將畢師鐸說駢云云駢駭然曰君言是也即令出軍有愛將呂用之者以左

道媚駢駢頗用其言用之懼師鐸等立功即奪已權從容謂駢曰相公勲業高矣妖賊未殄朝廷已有間言賊若盪平則威望震主功居不賞公安稅駕邪為公良畫莫若觀釁自求多福駢深然之乃止諸將但握兵保境而已驚聽錄朝廷議駢以文以武國之名將今此黃巢必喪於淮海也尋淮南表志云今大寇忽至入臣封巡未肯綿伏狼狐必能晦沉大衆但以山東兵士屯駐揚州各思故鄉臣遂放去亦具聞奏非臣自專今奉詔書責臣無備不合放回武勇又告城危致勞徵兵勞於往返臣今以寡擊衆然曰武經與賊交鋒已當數陣粗成勝捷不落姦謀固護一方臣必能了但慮寇設深計支梧官軍遷迤過淮彼岸無敵即東道將士以至藩臣繫朝廷速下明詔上委中書門下速與商量表至中書咸有異議遂京國士庶浮誇日興云淮南與巢衷私通連自固城池放賊過淮也妖亂志曰廣明元年七月黃巢自採石北渡直抵天長時城內士客諸軍尚十餘萬皆

良將勁兵議者慮狂寇有奔犯關防之患悉願盡力死戰用之等慮其立功之後侵奪已權謂勃海曰黃巢起於羣盜遂至橫行所在雄藩望風瓦解天時人事斷然可知令公既統彊兵又居重地只得坐觀成敗不可更與爭鋒若稍損威名則大事去矣勃海深以為然竟不議出軍巢遂至北馬初巢寇廣陵也江東諸侯以勃海屯數道勁卒居將相重任巢江海一通逃耳肉可掉折筮而擒之及聞安然渡淮由是方鎮莫不解體按駢宿將豈不知賊過淮之後不可復制若怨朝議有不附已者則尤欲破賊立功以間執讒慝之口若縱賊過淮乃適足實議者之言非所以消謗也借使駢實有意使賊震驚朝廷從而誅之則賊入汝洛之後當晨夜追擊以爭功名豈得返坐守淮南數年逗留不出兵乎又舊傳呂用之云恐成功不賞妖亂志云恐敗衄稍損威名夫大功既成則有不賞之懼豈有未戰不知勝負豫憂威望震主乎駢為都統控扼江淮而擁兵縱賊使安然北

渡其於威名獨無損乎雖用之淺謀無所不至駢自無
參酌一至此邪蓋駢好驕矜大言自恃累有戰功謂巢
烏合疲弊之衆可以節鉞誘致淮南坐而取之不意巢
初無降心反為所欺張潁驍將一戰敗死巢奄濟采石
諸軍北去見兵不多狼狽惶恐自保不暇故斂兵退縮
任賊過淮非故欲縱之實不能制也盧鵬閻於知人致
中原覆沒駢先銳後怯致京邑邱墟呂用之妖妄姦回
致廣陵塗炭皆人所深疾故衆惡歸焉未必實然也又
唐末見聞錄廣明二年十二月五日黃巢傾陷京國轉
牒諸軍据牒云屯軍淮甸牧馬頻陂則似在淮南時非
入長安後又續寶運錄云王仙芝既叛自稱天補均平
大將軍兼海內諸豪帥都統傳檄諸道其文與此畧同
末云願垂聽知謹告乾符二年正月三日此蓋當時不
逞之士偽作此文託於仙芝黃巢以譏斥時病未必其
人實有此
檄牒也

劉漢宏請降

實錄漢宏寇擾荆襄王鐸遣前濠州刺史崔錯招之至是始歸降辛未漢宏奏請於

濠州倒戈歸降優詔褒之按鐸奔襄陽漢宏始掠江陵

叛去鐸尋分司益未分司時遣錯招之又戊辰漢宏除

宿州云至是始降是已降也辛未又云請於濠州歸降

者朝廷聞其降戊辰已除官而辛未漢宏表方至也

十一月豆盧瑑請受黃巢天平節鉞

驚聽錄曰宰臣豆盧瑑奏緣淮南九

驛便至泗州恐高駢固守城壘不遮截大寇黃巢必若

過淮洛寇之計又徵兵不及須且誘之請降節旄授鄆

州節度候其至止討亦不難宰臣盧摯言之不可奏以

黃巢為國之患久矣昨與江西節制擁節而行攻劫荆

南却奪其節但徵諸道驍勇把截泗州因此不發內使

罷建雙旌乃發使臣諸道而去尋汴州徐州兩道告急

到京報黃巢過淮盧摯託疾不出按朝廷未嘗以江

西節與巢借使與之安可復奪此驚聽錄不足信也

張承範等發京師上御章信門遣之

新傳曰帝餞令攷章信門賫遺豐優

按令攷雖為招討都統賜節賚物其實不離禁閫是日所遣者承範等耳新傳云餞令攷誤也

上趣駱谷鄭畋謁於道次

續實運錄戊子帝至駱谷壻水驛乃下詔與牛勣楊師立

陳敬瑄云今月七日已次駱谷壻水驛按此月庚辰朔

戊子九日而詔云七日九誤為七也實錄辛卯車駕次

鳳翔鄭畋候謁於路舊畋傳云候駕於斜谷新紀辛卯

次鳳翔丁酉至興元按甲申上離長安辛卯始次鳳翔

太緩丁酉已至興元太速又路出駱谷則不過鳳翔及

斜谷蓋車駕涉鳳翔之境而畋往見耳非鳳翔與斜谷

也實錄賊以數萬衆西追車駕而不言追不及

又不言為誰所拒而還諸書皆無之今不取

黃巢妻曹氏為皇后

實錄巢傳立妻曲氏為皇后今從新傳

王重榮殺巢使與王處存結盟

舊王處存傳曰時李都守河中降賊會王重榮

斬偽使通使於處存乃同盟誓營於渭北時巢賊僭號天下藩鎮多受其偽命唯鄭畋守鳳翔鄭從讜守太原處存王重榮首倡義舉俄而鄭畋破賊前鋒王鐸自行在至故諸鎮翻然改圖以出勤王之師按鐸中和二年始至於時未也王重榮傳曰初重榮為河中馬步都虞候巢賊據長安蒲帥李都不能拒稱臣於賊賊偽授重榮節度副使重榮以賊徵求無已欲拒之都曰吾兵微力寡絕之立見其患願以節鉞假公翌日都歸行在重榮知留後事乃斬賊使求援鄰藩北夢瑣言曰重榮始為牙將黃巢犯闕元戎李都奉偽畏重榮附者多因薦為副使一日忽謂都曰今公助賊陷一邦於不忠而又日加算斂衆口紛紜然倏忽變生何以遏也遽命斬其偽使都無以對用以軍印授重榮而去及都至行在朝廷又以前京兆尹竇滎間道至河中代都重榮迎之滎

前為京兆尹有慘酷之名時謂之瑑疊及至翌日進軍校于庭謂曰天子命重臣作鎮將遏賊衝安可輕議斥逐令北門出乎且為惡者必一兩人而已爾等可言之湊不知軍校皆重榮之親黨也衆皆不對重榮乃屏肅佩劍歷階而上謂湊曰為惡者非我而誰遂召湊之僕吏控馬及階請依李都前例乃云速去湊不敢仰視躍馬復由北門而出新傳取之按十一月辛亥朔重榮已作亂掠坊市辛酉以重榮為留後都為太子少傅則都已去河中矣及黃巢犯闕都何嘗奉偽亦未嘗聞以湊代都今不取

中和元年正月陳敬瑄杖殺內園小兒

新傳曰敬瑄殺五十人戶諸衢

錦里耆舊傳曰有內園小兒三箇連手行遠行宮數內一人笑云云巡者亂打執之敬瑄咄之曰今日且欲棒殺汝三五十輩必不令錯按三五十輩者敬瑄語耳非實殺五十人也新傳誤

二月代北監軍陳景思

實錄作景斯今從薛居正五代史

二月景思請赦李克用

實錄陳景斯齋詔入達靼名李克用軍屯蔚州克用因大掠雁

門以北軍鎮薛居正五代史先是景思與李友金發沙陀諸部五十騎南赴京師友金即武皇之族父也中和元年二月友金軍至絳州將渡河刺史瞿稹謂景思曰巢賊方盛不如且還代北徐崗判官四月友金旋軍雁門瞿稹至代州半月之間募兵三萬營於崞縣之西其軍皆北邊五部之衆不閑軍濊瞿稹李友金不能制友金謂景思云云景師然之促奏行在天子乃以武皇為雁門節度使仍令以本軍討稹李友金發五百騎齋詔召武皇於達靼武皇即率達靼諸部萬人趨雁門按景思請赦國昌父子而獨克用至者蓋國昌已老獨使克用來耳是歲克用但攻掠太原又陷忻代二州明年十二月始自忻代留後除雁門節度使蓋此際止赦其罪

復為大同防禦使及陷忻代自稱留後朝廷再召之始除雁門薛史誤也新表中和二年以河東忻代二州隸雁門節度更大同節度為雁門節度治代州此其證也

宿州刺史拓跋思恭

歐陽修五代史作拓跋思敬意謂薛史避國諱耳按舊唐書實錄皆

作思恭實錄天復二年九月武定軍節度使李思敬以城降王建思敬本姓拓跋鄜夏節度使思恭保大節度使思孝之弟也思孝致仕以思敬為保大留後遂升節度又徙武定軍新唐書党項傳曰思恭為定難節度使卒弟思諫代為節度思孝為保大節度以老薦弟思敬為保大留後俄為節度然則思恭思敬乃是兩人思敬後附李茂貞或賜國姓故更姓李修合以為一人誤也

四月黃巢復入長安唐弘夫戰死

舊紀傳新傳皆云弘夫敗在二年二月驚

聽錄唐年補錄新紀實錄皆在
此年四月新紀日尤詳今從之

五月己未高駢出屯東塘

妖亂志曰自五月十二日出東塘至九月六日歸府九十

餘日獲雄雉之變也按五月十二日至九月六日乃一百一十三日非九十餘日也今從舊傳

忠武軍八都

劉恕十國紀年上云八都而下止有王建等七人姓名其一人諸書不可見故也

六月李克用陷忻代

唐末見聞錄六月三十日沙陀軍却回收却忻代州太祖紀年錄遇

大雨六月二十三日班師雁門薛居正五代史與紀年錄同按忻代先屬河東中和二年始割隸雁門今從見

實錄

七月鄭從讜斬論安

唐末見聞錄六月三十日沙陀收却忻代州使司差教練使論安軍

使王蟾高弁回鶻吐蕃等軍於百井下寨守禦當月內論安等拔寨却回到府按當月內即三十日也一日之中不容有爾許事必非也又曰至七月十四日相公排飯大將等於坐上把起論安不脫靴衫毯場內處置族滅其家又差都頭溫漢臣將兵依前於百井下寨當月內昇必尚書領兵馬却歸振武今從之

九月成麟殺高潯孟方立殺麟

實錄澤潯牙將劉廣據潯州叛天井關戍將孟

方立帥戍卒攻廣殺之自稱留後仍移軍頓於邢州初高潯援京師廣率師至陽平謀為亂不行還據潯州自稱留後用法嚴酷三軍畏之方立乘虛襲殺焉又曰貶昭義節度使高潯為端州刺史中和二年實錄又曰初孟方立殺高潯自立薛居正五代史方立傳曰中和二年為澤州天井關戍將時黃巢犯關輔州郡易帥有同博奕先是沈詢高湜相繼為昭義節度急於軍政及有歸秦劉廣之亂方立見潯帥交代之際乘其無備率戍

兵徑入潞州自稱留後新紀八月昭義軍節度使高潚
及黃巢戰于石橋敗績十將成麟殺潚入于潞州九月
己巳昭義軍戍將孟方立殺成麟自稱留後方立傳惟
以成麟為成鄰餘如新紀按乾符二年實錄十月昭義
軍亂逐節度使高潚貶潚家州司戶柳玭傳云貶高要
尉三年十一月詔魏博韓簡云劉廣逐帥擅權云云是
廣逐潚擅據潞州也薛史孟方立傳亦云沈詢高潚急
於軍政致有歸秦劉廣之亂是廣亂在前也舊紀九月
高潚牙將劉廣擅還據潞州是月潚天井關戍將孟方
立攻廣殺之自稱留後貶潚端州刺史此蓋舊紀誤實
錄因之薛史方立傳曰見潚帥交代之際率兵入潞不
言何帥交代若不逐帥何能據州事無所因殊為踈畧
舊紀恐是誤以高潚事為高潚事實錄此云殺廣明年
又云殺潚自相違新紀傳皆云成麟殺潚方立斬麟月
日事實頗詳必
有所出今從之

十二月閔勗逐李裕

實錄新傳作閔項今從程匡叟唐補紀

二年正月王鐸為都都統

舊紀中和元年七月鐸為都統十二年率師三萬至京畿

屯於盤屋舊鐸傳亦在元年唐年補錄元年十一月乙巳制以鐸為都統十二月乙亥鐸屯盤屋續寶運錄元年八月鐸拜天下都統唐補紀中和元年四月高駢率師駐泊東塘自五月出府九月却歸朝廷即以鐸都統諸道兵馬收復長安鐸為都統諸書年月不同如此新紀二年正月辛亥王鐸為諸道行營都都統高駢罷都統据實錄四月荅高駢詔罷都都統當在此年今從實錄新紀舊駢傳云僖宗知駢無赴難意乃以鐸為京城四面諸道行營兵馬都統韋昭度領江淮鹽鐵轉運使駢既失兵柄又落利權攘袂大詬累上章論列語詞不遜按駢罷都統依前為諸道鹽鐵轉運使五月方罷北夢瑣言曰王鐸初鎮荆南黃巢入寇望風而遁佗日將

兵潼關黃巢令人傳語云相公儒生且非我敵無污我鋒刃自取敗亡也後到成都行朝拜諸道都統所以高駢上表月之為敗軍之將也按鐸自荆南喪師貶官未嘗將兵潼關皮光業見開錄為都統在此年二月亦誤又舊紀傳新傳鐸止為都都統新紀作都統實錄初除及罷時皆為都統中間多云都都統又西門思恭為都都監按時諸將為都統者甚多疑鐸為都都統是也

三月阡能為盜

張彭錦里者舊傳作千能句延慶錦里者舊傳作阡能續寶運錄作阡能實錄

新傳作阡能按北夢瑣言安仁土豪阡能注云姓纂無此蓋西南夷之種今從之

六月羅渾擎等反

張彭者舊傳曰二年六月補楊行遷為軍前四面都指揮使千能亦散於

諸處下寨官軍頗不利八月羅渾擎反十月句胡僧反又曰九月千能渾擎胡僧與官軍大戰於乾溪官軍不

利十二月羅夫子反衆二千句延慶者舊傳曰二年五月羅渾擊反六月句胡僧反有四千餘人官軍與忤能戰於乾溪官軍大敗是月羅夫子反聚衆三千人實錄六月句胡僧反有衆二千餘官軍與能戰乾溪大敗按張傳上云十月胡僧反下云九月胡僧與官軍戰自相違又阡能敗差一年今從實錄並附之六月

七月韓求反

張彰者舊傳三年六月韓求反其邛州界內賊首于能邈迤漸侵入蜀州界今從句

延慶傳及實錄

南詔請降公主報以方議禮儀

張彰者舊傳中和元年九月三日雲南驃信差

布燮楊奇肱等齋國信來通和迎公主太師偕副使儀注郊迎布燮始相見揖副使云請不拜太師聞極怒朝廷告以俟更議車服制數定續有旨命竟空還今從雲南事狀及實錄

十月韓秀昇屈行從斷峽江路

張彭耆舊傳三年九月峽路賊韓秀昇十月

路賊屈行從反陳太師差押衙莊二夢將兵三千人十月二十日發往峽路句延慶耆舊傳於中和二年七月韓求反下又云峽路韓秀昇屈行從反川主選點兵士三千人差押衙莊夢蝶押領十月癸丑發峽路攻討韓秀昇蓋因十月討之而言耳實錄取句傳而誤於七月下云韓秀昇屈行從為亂敬瑄遣大將莊夢蝶以兵三千討之新傳曰涪州刺史韓秀昇等亂峽中今從句傳

朱瑄權知天平留後

實錄曹存實繼其叔父全晟為天平軍節度未周歲而遇害舊傳瑄

為青州王敬武牙將中和初黃巢據長安詔徵天下兵王敬武遣牙將曹全晟率兵三千赴難關西瑄已為軍候會青州警急敬武召全晟還路由鄆州時鄆將薛崇為草賊王仙芝所殺崔君裕權知州事全晟知其兵寡

襲殺君裕據有鄆州自稱留後以瑄有功署為濮州刺史留將牙軍光啓初魏博韓簡欲兼并曹鄆以兵濟河收鄆全畧出兵逆戰為魏軍所敗全畧死之瑄收合殘卒保州城韓簡攻圍半年不能拔會魏軍亂退去朝廷嘉之授以節鉞新傳與之同薛居正五代史瑄傳中和二年張濬徵兵於青州敬武遣將曹全畧率軍赴之以瑄隸焉賊敗出關全畧以本軍還鎮會鄆帥薛崇率部將崔君預據城叛全畧攻之殺君預因為留後瑄以功授濮州刺史鄆州馬步軍都將光啓初魏博韓允中攻鄆全畧為其所害瑄據城自固三軍推為留後允中敗朝廷以瑄為天平節度使據王仙芝死已久曹全畧久為節度使去歲死王敬武今歲始得青州新舊傳薛史皆誤今從實錄又新傳瑄作宣歐陽修五代史記注云今流俗以宣弟瑾於名加玉者非也今從舊傳薛史實錄

十一月李詳舊卒逐黃思鄴

實錄李詳下牙隊兵斬偽刺史黃思鄴推華陰鎮使

王遇為首降河中王鐸承制除遇為刺史按黃思鄴與黃巢俱死於虎狼谷實錄誤也今從新黃巢傳

高仁厚討千能

張彭耆舊傳中和三年冬千能轉盛官軍戰即不利陳敬瑄乃遣仁厚討之十

一月五日仁厚進發六日擒羅渾擎七日擒句胡僧得韓求首級九日擒千能得羅天子首級十一月二十二

日回戈自城北門入三日大設五日議功高公自檢校兵部尚書檢校左僕射授眉州刺史張彭耆語雖俚淺

或有抵牾然敘事甚詳苟無此書則仁厚功業悉沉沒矣句延慶傳中和二年仁厚梟五賊之首凱旋歸府冬

十二月戊寅皇帝御大玄樓高仁厚除授眉州刺史延慶不

知据何書知千能敗在二年冬然要之仁厚擒韓秀昇在三年十月初則擒千能必更在前矣十二月己亥朔

無戊寅日必誤也實錄二年十月草賊阡能於蜀州敗官軍陳敬瑄遣高仁厚討之實錄見句傳敘討千能事承十月癸丑發峽路收討韓秀昇下因附之十月亦誤也實錄又曰十二月仁厚以阡能首來獻帝御大玄樓宣慰回戈將士以仁厚為檢校工部尚書眉州防禦使亦因句傳而去其曰又此年十月戊辰昇眉漢彭綿等州並為防禦使故改刺史為防禦耳今高仁厚擒阡能既不知決在何年月故因實錄附於此

十二月李克用將兵至河中

實錄在明年正月今從新太祖紀年錄薛居正五代

史

李克讓為僧所殺

太祖紀年錄初克讓於潼關戰敗避賊南山隱於佛寺夜為山僧所害紀

綱渾進通冒刃獲免歸黃巢賊素憚太祖聞其至也將託情修好捕害克讓之僧十餘人殺之巢令其將米重

威齋重賂偽詔因渾進通見太祖乃召諸將領其賂燔其偽詔以徇薛史克讓傳曰乾苻中以功授金吾將軍留宿衛初懿祖歸朝憲宗賜宅於親仁坊武皇之起雲中殺段文楚也天子詔巡使王處存夜圍親仁坊捕克讓詰旦兵合克讓與十餘騎鬬躍馬突圍而出官軍數千人追之比至渭橋死者數百克讓自夏陽掠船而濟歸於雁門按克讓於時猶在雲州云雁門誤也後唐懿祖紀年錄曰其兄克恭克儉皆伏誅按是時國昌猶自請討克用朝廷必未誅其子蓋國昌振武不受代後克恭克儉始被誅也薛史又曰明年武皇昭雪克讓復入宿衛黃巢犯闕僖宗幸蜀克讓時守潼關為賊所敗按國昌以乾苻五年不受代朝廷發兵討之六年克用未嘗昭雪克讓何從得入宿衛廣明元年國昌父子兵敗逃入達靼其年冬黃巢陷長安克讓何嘗守潼關戰敗而死於佛寺或者為朝廷所圍捕時逃入南山佛寺為僧所殺則不可知也今事既難明故但云為寺僧所

殺而

已

孟方立遷昭義軍於邢州自稱留後

實錄中和四年正月以義成行軍司

馬鄭昌圖為中書舍人三月邢州軍亂殺其帥成麟以
中書舍人鄭昌圖權知昭義留後按成麟前已為孟方
立所殺況不在邢州邢州乃方立所治也又於時潞州
已為李克脩所據昌圖安得更往彼為留後又其年五
月以右僕射王徽同平章事充昭義節度使徽上表懇
述非便乃復以本官充大明宮留守舊王徽傳初潞州
軍亂殺成麟以兵部侍郎鄭昌圖權知昭義軍事時孟
方立割據山東三州別為一鎮上黨支郡惟澤州耳而
軍中之人多附方立昌圖不能制宰相奏請以重臣鎮
之乃授徽檢校尚書左僕射同平章事澤潞邢洛磁觀
察等使時鑾輅未還關東聚盜而河東李克用與孟方
正爭澤潞以朝廷兵力必不能加上表訴之曰鄭昌圖

主留累月將結深根孟方立專據三州轉成積釁招其
外則潞人胥怨撫其內則邪將益疑禍方熾於既焚計
柰何於已失須觀勝負乃決安危伏乞聖慈博求廷議
擇其可付理在從長天子乃以昌圖鎮之以徽為諸道
租庸供軍等使新孟方立傳曰方立攻成鄰斬之擅裂
邢洛磁為鎮治邢為府號昭義軍潞人請監軍使吳全
勗知兵馬留後時王鐸領諸道行營都統以潞未定墨
制假方立知邢州事方立不受因全勗以書請鐸願得
儒臣守潞鐸使參謀中書舍人鄭昌圖知昭義留事欲
遂為帥僖宗自用舊相王徽領節度時天子在西河關
中雲擾方立擅地而李克用窺潞州徽度朝廷未能制
乃固讓昌圖昌圖治不三月輒去方立更表李殷銳為
刺史乃徙治龍岡會克用為河東節度使昭義監軍祁
審誨乞師求復昭義軍克用殺殷銳遂并潞州表克脩
為留後按王鐸以三年正月罷都統則昌圖知昭義留
後必在二年也昌圖在潞不三月引去今徽以潞讓昌

圖則徹除昭義必不在四年五月實錄年月皆誤也方
立若已自稱昭義留後遷軍額於邢州則不止割據三
州若欲別為一鎮則應別立軍名必不與潞州並稱昭
義若但以潞為支郡當自除刺史不以書與王鐸更求
儒臣就使求之鐸亦當以昌圖為潞州刺史不云知昭
義軍事又不得以澤州為支郡也蓋方立既殺成麟以
邢州鄉里欲徙鎮之故身往邢州而潞人不從故請全
勛為留後方立以衆情未洽未敢自立故因全勛外示
恭順託以中人不可為帥而請於王鐸乞除儒臣其意
以儒臣易制欲外奉為帥而自專軍府之政漸謀代之
也既而昌圖至潞欲行帥職而山東三州已為方立所
制不受帥命獨澤州在南尚可號令耳故王徽表云昌
圖主留累月已深結根言在澤潞已久人心稍附已所
不如也又云方立累據三州轉成積釁謂昌圖欲行帥
權而方立不率將職互相窺覷故積釁也又云招其外
則潞人皆怨撫其內則邢將益疑謂今邢潞已成豐隙

已至彼欲加惠於邢則潞人怨其寵賊加惠於潞則邢將疑其圖己也又云須觀勝負乃決安危謂昌圖能勝方立然後昭義乃安也昌圖在潞終不自安故以軍府授方立而去方立然後自稱留後徙軍額於邢州以潞為支郡表殷銳為刺史故新傳徙治龍岡在殷銳為刺史下此其證也於是潞人怨而召沙陀當徽除節制之時克用猶未敢爭澤潞也吳全勛疑是方立初入潞府時監軍故王鐸使知留後方立既囚之疑其遂斥去祁審誨恐是鄭昌圖時監軍太祖紀年錄云方立虜審誨自稱留後薛居正五代史方立傳云方立以邢為府以審誨知潞州事三說不同且既虜審誨必不以知潞州方立表李殷銳為刺史而審誨猶依舊必是後來監軍方立以其未嘗異己故不疑之若嘗被囚虜必不復留此之不實昭然可知疑唐末昭義數逐帥劉廣成麟作亂被殺人皆知之記事者不詳考正或以先者為後後者為先差互不同故諸書多抵牾不合耳又薛史安崇

阮傳云安文祐初為潞州牙門將光啓中軍校劉廣逐節度使高潚據其城僖宗詔文佑平之既殺劉廣召赴行在授邛州刺史其後孟方立據邢洛攻上黨朝廷以文祐本潞人也授昭義節度使令討方立自蜀至澤州與方立戰敗歿於陣按諸書皆無文祐為昭義節度使事況光啓中澤潞已為李克脩所據文祐來當與克脩戰不得與方立戰也其事恐虛今不取

資治通鑑考異卷二十四